


遼史拾遺
四





遺拾史籙

(四)

撰 鶚 厲

遼史拾遺卷十四

志第十地理志四

南京道

南京析津府。○諸宮名。補。○梳妝樓。補。○會同館。補。○望京館。補。○居庸、松亭、榆林之關。古北之口。桑乾河、高粱河。○大安山、燕山。○採魏院。補。○蕭太后城。補。○白塔。補。

契丹國志曰。南京本幽州地。乃古冀州之域。舜以冀州南北廣遠。分置幽州。以其地在北方幽陰也。東有朝鮮。遼東北有樓煩。白檀。西有雲中。九原。南有潯沱。易水。唐置范陽節度。臨制奚。契丹。自晉割棄。建爲南京。又爲燕京析津府。戶口三十萬。大內壯麗。城北有市。陸海百貨。聚於其中。僧居佛寺。冠於北方。錦繡組綺。精絕天下。膏腴蔬蔬。果實稻粱之類。靡不畢出。而桑柘麻麥。羊豕雉兔。不問可知。水甘土厚。人多技藝。秀者學讀書。次者習騎射。耐勞苦。石晉未割棄已前。其中蕃漢雜鬪。勝負不相當。旣築城後。遠望數十里間。宛然如帶。回環繚繞。形勢雄傑。真用武之國也。○王士點禁扁曰。遼以幽州爲南京。宮之扁曰永興。曰積慶。曰延昌。曰章敏。曰長寧。曰崇德。曰興聖。曰敦睦。曰永昌。曰延慶。曰長春。曰太和。曰延和。殿之扁曰清涼。曰元和。曰嘉寧。堂之扁曰天膳。樓之扁曰五花。曰五鳳。曰迎月。閣之扁曰乾文。門之扁曰元和。曰南端。曰萬春。曰千秋。曰鳳凰園。曰柳園。○沈德符野獲編曰。大內北苑中有廣寒殿者。

舊聞爲耶律后梳妝樓。○高士奇金齧退食筆記曰：瓊華島在太液池中，其巔古殿，相傳本遼太后梳妝臺。○范成大攬轡錄曰：會同館，燕山客館也，遼已有之。○孫承澤春明夢餘錄曰：望京館在城東北五十里孫侯村，遼建爲南北使臣宿息餞飲之所。宋王曾上契丹事曰：出燕京北門，至望京館，卽此。○樂史太平寰宇記曰：居庸關在今昌平縣西北，北齊改爲納款，淮南子云：天下九塞，居庸是其一。○北邊備對曰：太行山南自河陽，懷縣迤邐北出，直至燕北，無有間斷，此其爲山不同他地，蓋數千百里，自麓至脊，皆陡峻不可登越，獨有八處羸通微徑，名之曰陁，居庸關者卽其最北之第八陁也。此陁東西橫互五十里，而中間通行之地才闊五步。○羅璧識遺曰：河北以居庸諸關爲險，蓋居燕百里外，關外名虎北口，卽漢上谷郡，其山西連太行，東互遼海，狼居胥諸山爲襟帶，關南北通處，路繞兩崖間，風起人行或爲所掀，彭文子謂隘如綫，側如傾，其峻絕天，其降趨井，下有澗，巨石磊砢，凡四十五里，艱折萬狀，山外寒氣先，山南兩月，燕之東百里曰榆關，蓋自虎北口下，皆亂山層複，至此循海，方有狹徑，實遼東諸州之障阻，昔時守以土步，狹不能入，自石晉割關南十六州，劉仁恭割營平、灤三州，略契丹，由是北自定武達灤海，千里失險。○讀史方輿紀要曰：松亭關在喜峯口北百二十里，遼人自燕京之中京，每自松亭趨柳河。○奉使行程錄曰：出榆關，以東山川風物與中原殊異，當契丹全盛時，但土城存，居民數十百家，及官舍三數椽，不及中朝一小鎮，強名爲州。○又曰：第十四程自營州一百里至潤州，離營州東行六十里至榆關，竝無保障，但存遺趾，有居民三四家，登高四望，東自碣石，西徹五臺，幽州之

地沃野千里。北限大山重巒。中有五關。居庸可以通大車。運轉餉。松亭。金坡。古北口。止通人馬。不可行。車外有十八路。盡兔徑鳥道。止能通人。不可行馬。山之南。地則五穀百果。良材美木。無所不有。出關未數十里。則山童水濁。皆瘠鹵。彌望黃茅白葦。莫知其極。蓋天設此以限南北也。○資治通鑑注引沈括曰。檀州東北五十里有金溝館。自館少東北。乍原乍隰。三十餘里。至中頓。過頓。屈折北行。峽中。濟灤水通三十餘里。鉤折投山隙以度。所謂古北口也。○高士奇塞北小鈔曰。古北口。蕭寺刻宋蘇文定公轍古北口道中詩云。亂山環合疑無路。小徑縈回長傍谿。髣髴夢中尋蜀道。興州東谷鳳州西。宋史元祐間。轍嘗代軾爲翰林學士。尋權吏部尚書。使契丹。館客者侍讀學士王師儒。能誦洵。軾之文。及轍伏苓賦。此蓋奉使時所題也。○韓琦安陽集過虎北口詩曰。東西層巒鬱嵯峨。關口纔容數騎過。天意本將南北限。卽今天意又如何。○顧炎武昌平山水記曰。古北口城北門外。有宋楊業祠。業以雍熙中爲雲州觀察使。契丹陷寰州。遇於雁門北陳家谷口。力戰不支。被擒。不食三日死。忠矣。然雁門之北口。非古北口也。祠於斯者。誤也。○劉敞公是先生集。楊無敵廟在古北口。其下水西流。詩曰。西流不返日滔滔。隴上猶歌七尺刀。慟哭應知賈誼意。世人生死兩鴻毛。○蘇轍欒城集古北口楊無敵廟詩曰。行祠寂寞寄關門。野草猶知避血痕。一敗可憐非戰罪。太剛嗟獨畏人言。馳驅本爲中原用。嘗享能令異域尊。我欲比君周子隱。誅彤聊足慰忠魂。

鶚案。古北口楊無敵祠。顧氏以爲誤。考劉遵父。蘇子由二詩。在奉使時作。則祠。翺自遼日可知。無敵

忠義感動敵境。又何論古北口之非陳家谷也。

范成大石湖集曰。盧溝去燕山三十五里。宋敏求謂蘆菰河卽桑乾河也。○蘇轍欒城集渡桑乾詩曰。北渡桑乾冰欲結。心畏穹廬三尺雪。南渡桑乾風始和。冰開易水應生波。穹廬雪落我未到。到時堅白如盤陀。會同出入凡十日。腥羶酸薄不可食。羊脩乳酪差使人。風墜沙場不宜客。相攜走馬渡桑乾。旌旆一返無由還。胡人送客不忍去。久安和好依中原。年年相送桑乾上。欲話白溝一惆悵。○太平寰宇記曰。高粱河在薊縣東四里。南流合桑乾水。桑乾水自西北昌平縣界來。南流經府西。又東流經府南。又東南與高粱河合。又水經注云。桑乾水東流與洗馬溝水合。○讀史方輿紀要曰。太安山在房山縣北八十里。山高險。薛居正曰。太安。幽州西名山也。○又曰。燕山在玉田縣西北二十五里。晉咸康四年。石虎攻段遼。遼將北平相陽裕登燕山以自固。卽此。○水經注云。灑水南逕燕山下懸巖之側。有石鼓。去地百餘丈。望若數百石。困有石梁貫之。鼓之東南有石人。援桴狀同擊勢。耆舊言燕山石鼓鳴。則主有兵。○春明夢餘錄曰。探魏院石塔記。遼景福元年建。燕京寶塔寺講律沙門如正述。塔在今蕃育署。○劉定之呆齋集曰。京師西南五六里外有舊城。唐藩鎮遼。金別都之城也。元遷都稍東。於是舊城東半。遂入於朝市間。而西半猶存。號爲蕭太后城。蕭太后者。遼后皆以蕭爲姓。有子爲帝。則太后別居宮城。統部屬。故其亡也。末帝淳之妻。猶得獨存。稱太后以主其國。踰年乃滅也。○劉侗帝京景物略曰。白塔建自遼壽昌二年。相傳藏法寶種種。靜夜有光。至元八年。世祖發視之。舍利二十粒。青泥小塔二千。

石函銅餅。香水盈滿。前二龍王跪而守護。案上無垢淨光陀羅尼五部。軸以水晶金石珠琢異果十種。例爲供餅。底一錢。錢文至元通寶四字也。世祖驚異。乃加崇飾。或言遼主於燕京五方。方鎮以塔。塔五色。兵燹後。惟白塔存。○蔣一葵長安客話曰。妙應寺在阜城門內。寺右偏有白塔。創自遼壽昌二年。爲釋迦佛舍利建。

○析津縣。○薊丘。補

清類天文分野之書曰。大興。秦薊縣。漢爲廣陽國。東漢爲郡。兼立幽州。仍爲薊縣。晉屬燕國。元魏亦爲幽州。立燕郡。隋爲涿郡。唐爲幽州治所。開元二十三年。陞爲望縣。建中二年。析西界置幽都縣。五代亦爲薊縣。石晉割地予遼。開泰元年。更縣爲析津。金天德五年。改爲大興縣。○京東考古錄曰。漢書。薊。古燕國。召公所封。後漢書。薊本燕國。刺史治水經注。城內西北隅有薊丘。因丘以名邑也。唐書地理志。幽州范陽郡治薊。開元十八年。析置薊州漁陽郡。治漁陽。及遼。改薊爲析津縣。因此。薊之名遂沒於此。而存於彼。今人乃以漁陽爲薊。而忘其本矣。史記樂毅書。薊丘之植。植於汶篁。一統志。城西北隅卽古薊門。舊有樓館。竝廢。但門外存二土阜。旁多林木。頗爲近之。

○宛平縣。○香山。補。○玉泉山。補。○五華山。補。○仰山。補。○菩薩山。補。○盧師山。補。○覺山。補。○雙泉山。補。

元混一輿地要覽曰。宛平本幽都縣。薊縣西界地。唐爲燕州。朱希彩奏爲廣甯縣。後爲朱滔所陷。廢燕

州立幽都縣。遼改宛平。香山、玉泉山、五華山、仰山、菩薩山俱在西北。盧師山、覺山、雙泉山俱在西。○徐善泠然志曰：香山寺趾遼中丞阿里吉所捨。○宋啓明長安可遊記曰：香山有乳峯石，時噓雲霧，類匡廬香爐峯故名。

鶻案北遼宣宗耶律洵葬燕西香山永安陵，香山之名已見遼史。

孫國枚燕都遊覽志曰：玉泉山有巨穴，泉歎而上，淙淙有聲，或名之噴雪泉。○長安客話曰：仰山峯巒拱秀，中頂如蓮花心，旁有五峯，曰獨秀、翠微、紫蓋、妙高、紫微，中多禪刹，以在山西外更西四十餘里，故人跡罕到。○明一統志曰：菩薩崖在府西北一百二十里，山畔有三石佛像。○長安客話曰：盧師山以神僧得名，師隋末居此山，能馴二龍，子山有潭，覆以巨石，其下深不可測，二龍潛焉，歲旱禱雨輒應。○明一統志曰：覺山在府西三十里，懸崖之上，與盧師平坡鼎峙，西有三泉，曰清泠，曰清旨，曰洵至。○燕都遊覽志曰：覺山、漢左馮翊韓延壽墓在焉，五華、雙泉、翠微、仰山諸峯環之如屏。

○昌平縣。○軍都山補。○溼榆河補。○九聖寺補。

太平寰宇記曰：軍都山又名居庸山，在縣西北十里。後漢書曰：尙書盧植隱居上谷軍都山，立覺肆教授，好學者自遠方而至。○輿地廣記曰：縣北十五里有軍都陁，西北三十五里有納款關，卽居庸故關，亦謂之軍都關。○崔學履昌平州志曰：溼榆河在州治東南五十里，源出軍都山，南流又折而東，以入於潞河。○又曰：九聖寺在州治東，遼乾統五年建。

○良鄉縣。○鹽溝河。補。○樂毅墓。補。

奉使行程錄曰。良鄉縣乃唐莊宗時趙德鈞所鎮也。幽州歲苦契丹侵鈔。轉餉乃於鹽溝置良鄉縣。○牛象坤良鄉縣志曰。鹽溝河發源自宛平縣龍門關。東南流經縣境陶村里。入桑乾河。

鴉案。鹽溝。通鑑作閻溝。

皇甫鑒城家記曰。燕廣城君樂毅墓在縣南三里。○

○潞縣。○平谷縣故城。補。○安樂縣故城。補。○潞水。○通潞亭。補。

杜佑通典曰。漢平谷縣故城在今縣北。又有漢安樂縣故城在西北。○太平寰宇記曰。潞河一名沽河。一名鮑丘水。北自檀州密雲縣界流入。水經注云。鮑丘水又東南歷夏謙澤。後魏諸州地記云。潞縣城西三十里有潞河。源出北山。南流。謂此水也。○水經注曰。高粱水東至潞縣。注於鮑丘水。又南逕潞縣故城西。王莽之通潞亭也。

○安次縣。○石梁城。○常道城。○桃水。補。○定覺寺。補。○劉琨墓。補。○韓澤墓。補。○留犢村。補。

讀史方輿紀要曰。石梁城在舊州頭東南五十里。或云南北朝時所置戍守城也。其地又有崧州城。相傳遼古刺王所置。○又曰。常道城在舊州頭西五里。三國魏燕王宇之子璜封常道鄉公。甘露五年。司馬昭迎立之。北魏主宏封宇文英爲常道鄉公。皆此城也。○張文舉東安縣志曰。桃水首受涑水分。東至安次入河。見漢志。

鶚案元初克燕改縣爲東安州明初降爲東安縣。

東安縣志曰定覺寺在縣西北七十里常道鄉唐垂拱三年賜額五代燬於兵遼天慶間承直郎張銑重建○明一統志曰劉琨墓在東安縣東二十里○東安縣志曰遼中丞韓澤墓在縣西北五十里乾隆八年葬○曹學佺名勝志曰留犢村在縣西北六十里魏鉅鹿時苗爲壽春令及歸留犢而行回經於此因以名里。

○永清縣

讀史方輿紀要曰永清縣石晉時沒於契丹周世宗復取之宋初爲霸州治景祐二年并入文安縣金復置□□□□碑前一碑太平五年立者已失○許鋌武清縣志曰大河以北之水多從直沽入海此卽古者九河入海之處。

鶚案寶坻本遼武清縣新倉地金大定中置縣。

○香河縣○海運故道補

長安客話曰香河縣境南大龍灣小龍灣二水夏秋始合流經寶坻縣界入七里海相傳遼時海運故道。

○玉河縣○劉仁恭於大安山創宮觀師鍊丹羽化之術於方士王若訥因割薊縣分置以供給之唐書曰劉仁恭從方士王若訥學長年築館大安山掠子女充之又招浮屠與講法以葺土爲錢斂真

饒穴山藏之。殺匠滅口。禁南方茶。自攝山爲茶。號山曰大恩。以邀利。

○灤陰縣。○獨秀園亭。補

張祥灤縣志曰。獨秀園亭在縣北二里。遼司徒郭世珍建。

宋王曾上契丹事。○古督亢亭之地。○劉李河。○閔忠寺。

太平寰宇記曰。督亢陂在范陽縣東南十里。劉向別錄。督亢。燕膏腴之地。孫暢之述。畫云。燕太子丹使荆軻齎督亢地圖入秦。謀殺秦王。尋爲秦滅。郡國志引餘野曰。方城縣有督亢亭。○石湖集曰。琉璃河又名劉李河。在涿州北三十里。水極清泚。茂林環之。尤多鴛鴦。千百成羣。此河大中祥符間。路振乘輅錄。亦謂琉璃河。唯嘉祐中。宋敏求入蕃錄。乃謂之六里河。○虜庭事實曰。燕山京城東壁有大寺一區。名憫忠。廊下有石刻云。唐太宗征遼東。高麗回。念忠臣孝子。沒於王事者。所以建此寺而薦福也。東西有兩甃塔。高可十丈。云是安祿山。史思明所建。

○順州歸化軍中刺史。○溫渝河。○黍谷山。補○牛闌山。補○齊長城。○駁。補

王應麟通鑑地理通釋石晉十六州考曰。順州順義郡在范陽郡城。幽州唐天寶初置。治賓義縣。九域志。化外順州。領賓義一縣。唐置突厥州順州。貞觀四年。平突厥。以其部落置於幽靈之境。後僑治幽州城中。○資治通鑑注引沈括曰。幽州東北三十里。有望京館。東行少北十餘里。出古長城。又二十里至中頓。又踰孫侯河。行二十里至順州。土厚宜稼。○昌平山水記曰。溫餘河卽昌平之榆河。下流爲沙河。

入順義西南界。下至通州入潞河。順義謂之西河。金人名縣曰溫陽。以此遼史作溫渝河。本水經之濕餘河。以字相似而譌也。○日下舊聞曰。後漢書。王霸爲上谷太守。陳委輸。可從溫水漕。以省陸轉輸之勞。事皆施行。章懷太子注。引水經注。本作溫餘水。遼史。順州有溫渝河。金更懷柔縣爲溫陽。豈盡無據。又昌平多溫泉。有流入雙塔河者。溫餘之名。竊疑因此。水經注既無善本。今人習見坊刻。遂指溫字爲濕字之譌。正恐類昔人所云。以不悖爲悖也。○楊靈順義縣志曰。溫榆河在縣治西南三十里。起於口北。由沙河下達於漕河。中有三渡。俗名葦溝河。○明一統志曰。黍谷山在懷柔縣東四十里。跨密雲縣界。亦名燕谷山。○文昌雜錄曰。余奉使北遼。過順州。有黍谷坊。接伴副使王仲淵指以謂副使。文供備云。觀此可知其寒也。劉向別傳曰。燕地谷美而寒。不生五穀。鄒子吹律召溫氣。至五穀生。至今名黍谷。北遼士子多燕人。故亦頗知問學也。○塞北小鈔曰。牛闌山在順義縣北二十里。相傳山有中峯洞。洞內金牛時常出現。然山不甚高。遠望之。僅蜿蜒一邱耳。

鶚案牛闌山見王沂公上契丹事

昌平山水記曰。順義縣西南二十里有天柱村。三十里有葦溝村。村東臨溫餘河渡。渡南有長城遺跡。遼史。順州南有齊長城。城東北有華林。天柱二莊。遼建涼殿。春賞花。夏納涼者也。齊長城。齊天保中所築。宋沈括曰。幽州東北三十里有望京館。東行少北十里餘。出古長城。卽此。○羅願爾雅翼曰。劉原父奉使契丹時。聞順州山中有異獸如馬。食虎豹。虜人不識。以問之。曰。此所謂駁也。爲言形狀聲音皆是。

虜人歎服。

○懷柔縣○呼奴山補看花臺補

周仲士懷柔縣志曰呼奴山縣東南三十里漢鄧禹子訓與上谷太守任興屯兵防匈奴烏桓於此○又曰看花臺縣北三十里遼蕭后避暑北上嘗登臺看花○明一統志曰呼奴山亦名狐奴山○昌平山水記曰狐奴山西南百步有漢狐奴縣址魏文帝黃初二年省。

○檀州武威軍下刺史○桑溪○鮑邱水補桃花山○螺山

劉敞公是先生集檀州詩曰窮谷回看盡孤城平望遙自古北口山至此都盡市聲衙日集此州衙日市集海蓋午時消每旦海氣如霧至午消盡土人謂之海蓋冠帶才通漢山川更入遼春風解冰雪最覺馬蹏驕○太平寰宇記曰螺山水一名赤城河即沽水也東北塞外流入桑溪水水經注桑溪水經伏陵山南與石門水合是水有桑溪之名蓋源出桑溪故也右注鮑邱水鮑邱水水經注鮑邱水又東南龍芻溪水注之是也○水經注曰鮑邱水又南逕儻奚縣故城東王莽更之曰敦德也○太平寰宇記曰桃花山在漁陽西北一十五里○明一統志曰紅螺山在懷柔縣北二十里高二百餘仞下有潭潭中嘗有二螺色殷紅夕吐光燄土人異之因以名山

○密雲縣○潮河補○密雲山補○白檀山補○普濟寺補○冶山寺補○劉存規墓補

續通典曰檀州密雲縣即漢厓奚縣舊治厓音驪○塞北小鈔曰潮河在縣東南自古北口流入縣界

西南流至順義縣合於白河。○昌平山水記曰：密雲山一名橫山，郡所以名也。縣南二十里爲白檀山，漢所以名縣也。○劉效祖密雲縣志曰：普濟寺，縣東北八十里。遼統和五年建，清寧二年重修。內有顯公和尚祠。冶山上寺，冶山下寺。遼重熙八年建。○又曰：劉存規，字守範，仕遼爲積慶宮都提轄使，金紫榮祿大夫，檢校司空兼御史大夫，上柱國，卒於應歷五年，葬密雲縣嘉禾鄉，有墓志。

○涿州永泰軍上刺史。○大房山。○孔水洞。補。○六聘山。○涿水。○樓桑河。○祁溝河。○范村。補。○駝羅

口。補。○涿鹿山。補。○雲居寺。補。

奉使行程錄曰：涿州古涿郡，黃帝與蚩尤戰於涿鹿之野，卽此地。昔爲契丹南塞邊城，樓壁俱存。及郭藥師舉城內屬，不經兵火，人物富盛，井邑繁庶。近城有涿河，劉李河合范河東流入海，故名范陽。○通鑑地理通釋曰：涿州，涿郡。唐大歷四年，節度使朱希彩表析幽州之范陽、歸義、固安置，治范陽。○王安石臨川集涿州詩曰：涿州沙上望桑乾，鞍馬春風特地寒。萬里如今持漢節，卻尋此路使呼韓。○又出塞詩曰：涿州沙上飲盤桓，看舞銀貂小契丹。塞雨巧催燕淚落，濛濛吹溼漢衣冠。○太平寰宇記曰：大防山在良鄉縣西北三十五里，山下有石穴。○史恆德涿鹿記曰：房山在涿郡西北五十里，北接居庸，東抵漁陽，西連紫荆，所謂幽燕奧室也。○名勝志曰：大房山，南晉霍原隱處。○黃榜房山縣志曰：孔水洞在大房山東北，其上懸崖千尺，其下石竇如門，流水涌出，深不可測。時有白龍出遊，往往樵牧聞絲竹之音，開元間，旱，每遣人投以金龍玉璧，禱之輒應。○明一統志曰：六聘山在房山縣西三十里。○太

平寰宇記曰。涿水源出縣西土山下。東北流經縣北五里。又東流注聖水。應劭注漢書曰。涿水出上谷。涿鹿縣。水西入海。十三州志云。涿郡南有涿水。北至上谷爲涿鹿河。其支流入匈奴中者。謂之涿邪水。○水經注曰。樓桑里。劉備之舊里也。○長安客話曰。州西南三十里岐溝。宋時置關以備契丹者。○讀史方輿紀要曰。范村在州西南。宋宣和四年童貫伐遼。至高陽關。遣辛興宗總西路兵趨范村。爲遼人所敗。○又曰。駝羅口在州東北。宋雍熙中圍涿州。契丹主隆緒由駝羅口應援。卽此。○唐舜卿涿州志曰。獨鹿山卽涿鹿山也。在州城之西一十五里。○遼沙門志才涿鹿山雲居寺續祕藏石經塔記曰。古之碑者。用木爲之。乃葬祭饗聘之際所植一大木。而字從石者。取其堅久也。秦漢已降。凡有功德政事。亦碑之。欲圖不朽。易之以石。雖失其本。從來所尙。不可廢焉。浮圖經教。來自西國。梵文具葉。此譯華言。盡書竹帛。或邪見而毀壞。或兵火而焚爇。或時久而蝨爛。孰更印度求諸與。有隋沙門靜琬。深慮此事。厲志發願。於大業年中。至涿鹿山。以大藏經刻於貞珉。藏諸山竇。大願不終而奄化。門人道公儀公。暹公。法公。師資相踵。五代造經。亦未滿師願。至遼劉公法師。奏聞聖宗皇帝。賜普度壇利錢。續造。次興宗皇帝。賜錢。又造。相國楊公遵勗。梁公穎。奏道宗皇帝。賜錢。造經四十七帙。通前上石。共計一百八十七帙。已厝東峯七石室內。見今大藏。仍未及半。有通理大師。緇林拔秀。名實俱高。教風一扇。草偃八紘。其餘德業。具載寶峯本寺遺行碑中。師於茲山寓宿。有續造念。興無緣慈。爲不請友。至大安九年正月一日。遂於茲寺。放開戒壇。士庶道俗。入山受戒。叵以數知。方盡暮春。始得終罷。所獲錢施。乃萬緡。付門人。

右街僧錄通慧圓照大師善定校勘刻石石類印版背面俱用鐫經兩紙至大安十年錢已盡功且止碑四千八十片經四十四帙題名目錄刻如左未知後代誰更繼之又有門人講經沙門善銳念先遺風不能續扇經碑未藏或有殘壞與定師共議募功至天慶七年於寺內西南隅穿地爲穴道宗皇帝所辦石經大碑一百八十片通理大師所辦石經小碑四千八十片皆藏瘞地穴之內上築臺砌甃建塔一座刻文標記石經所在○于奕正天下金石志曰雲居寺續鐫石經記趙遵仁撰清寧四年○遼沙門智光重修雲居寺記曰應歷十四載寺主謙諷完葺一寺結邑千人請右補闕琅邪王公正作碑頃因兵火遂至傷闕補闕子諸行宮都部署判官都官員外郎賜紫金魚袋教念先人遺跡出俸錢再修以釋智光乃考之執友也故命刊述勒之時睿德神略應運啓化承天皇太后至德廣孝昭聖皇帝御極之二十三年統和乙巳歲八月丁丑朔十一日丁亥記○帝京景物略曰房山縣西南四十里有山曰白帶山生懋題草又曰懋題山藏石經者千年矣故曰石經山亦曰小西天云

鶚案房山縣金爲奉先縣元改房山遼時未有縣地屬涿州白帶山卽涿鹿山也王正碑文已入文苑傳補

○范陽縣○涿水○范水

水經注曰涿水出涿鹿山世謂之張公泉東北流逕涿鹿縣故城南王莽所謂搗陸也黃帝與蚩尤戰於涿鹿之野留其民於涿鹿之阿卽是處也○名勝志曰范水在州西南水北曰陽范陽郡名以此

○固安縣。○渾河補。○韓城補。○武陽城補。○法華寺補。○歸依寺補。○大師塔補。

蘇志皋固安縣志曰。渾河在縣西二十餘里。本桑乾河。又名漯河。俗呼渾河。亦曰小黃河。以流濁故也。源出山西大同府馬邑縣東北十里桑乾山。南經縣境。至武清縣小直沽。與衛河合流。入於海。○水經注曰。固安東南逕韓城東。詩韓奕章曰。溥彼韓城。燕師所完。王肅曰。今涿郡方城縣。有韓侯城。世謂寒號非也。○固安縣志曰。武陽城在縣西北。燕昭王之所築也。○又曰。法華寺在縣東二十五里。石碣有云。大遼國燕京涿州固安縣萬春鄉皇臺里鄉貢進士張希顏述。考將仕郎試太子正字前守涿州司法參軍張鞏書。重熙間。重修募緣碣有云。時遷歲暮。墮殘蟬螻之梁。雨壞風摧。打碎鴛鴦之瓦。又云。若抽鵝眼之資。必值龍華之會等語。○又曰。歸依寺在縣東北十八里。遼天慶七年立幢。大師塔在東徐村。遼奉聖州司候判官給事郎試太子校書郎騎都尉蔡咨彥立碣。有進士焦山等字。天慶元年建。

○新城縣。○白溝河補。○時承諫墓補。

程卓正惠公使金錄曰。嘉定四年十二月二十三日。過白溝河。昔與遼人分界。又十里過大白溝河。亦名巨馬河。○何濟新城縣志曰。白溝河在縣南三十里。出山西代郡涑山。由涑水。定興爲巨馬河。至新城南爲白溝河。卽宋遼分界處。○又曰。時承諫墓在縣東北二里。本遼人。金贈鎮東節度使兼侍中金李晏時立愛墓誌銘云。公父諱承諫。積累巨萬。發倉貸人。每折其券。負郭沮洳。常阻行路。創石爲梁。人得平步。善慶攸鍾。是生我公。

鷄案金史時立愛傳承諫作承謙誤。

○歸義縣○易京補○重脣魚補

通典曰歸義縣漢易縣地公孫瓚於此置易京在今縣南十八里又有巨馬水○涿州志曰重脣魚惟巨馬河有之因比他魚重脣故名。

○易州高陽軍上刺史○易水○黃金臺補○燕子城補○狼山○太寧山○樊館山補○荆軻山補○

吟詩臺補○五華樓補○福感寺補○靜覺寺補

輿地廣記曰漢故安縣故城在今縣南易水所出燕太子丹送荆軻入秦祖道於水上軻起爲壽歌曰風蕭蕭兮易水寒壯士一去兮不復還卽此○戴銑易州志曰黃金臺在州治東南四十里昔燕昭王師事郭隗築臺置千金於上以延天下士士爭趨燕故號黃金臺○癸辛雜識曰保定府之西有易州卽郭藥師起兵處在易水北州東南有故城土人號曰燕子城○明一統志曰郎山在保定府城西北五十里一名狼山其峯尖銳如削皎然玉立○又曰大寧山在易州城西五十里中有大寧寺○冊府元龜曰劉昫涿州人唐天祐中契丹陷其郡昫被俘至新州逃而獲免隱居上谷大寧山○林焜章易水志曰樊館山在州西七里是樊於期授首處荆軻山在州西五里昔燕丹尊軻上卿館此○記纂淵海曰吟詩臺在易州西大寧山五代馮道吟詩於此○明一統志曰五華樓在易州治卽燕侯雲物臺遼聖宗嘗御此樓書刺史馬質兵監趙質姓名於西壁○易水志曰福感寺在州東一里遼統和二十

八年建上中下靜覺寺在大寧山遼大安二年建

○涑水縣本漢道縣○周大象十八年改涑水縣在州東四十里有涑水

易州志曰拒馬河在涑水縣治東一里許源出廣昌涑山又東南至定興縣西與白澗河合又東至新城縣界爲白溝河又東注霸州合直沽入於海一名涑水以其發源涑山得名非實有二也○高士奇扈從西巡日錄曰涑水縣城舊在拒馬河西北二里俗名周城灣水經曰拒馬河出代郡廣昌縣涑山酈道元注曰卽涑水也

鶚案周城灣當卽周大象中所改城也

○容城縣○三臺城補

記纂淵海曰三臺城在容城縣境昔燕魏分易水爲界築三臺以耀武

○薊州尙武軍上刺史○盤山補○石門鎮補○感化寺補○獨樂寺補○祐唐寺補○韓氏賜田補○芹萊山補

夢溪筆談曰予使遼至古契丹界大薊茭如車蓋中國無此大者其地名薊恐其因此也如揚州宜楊荊州宜荆之類荆或爲楚楚亦荆木之別名也○熊相薊州志曰盤山一名盤龍山在城西北二十五里高二千餘仞周百餘里勢旁礧而盤桓因以名之山北數峯陡絕林立如削曰紫蓋曰宿猿尤爲奇特最高者曰上盤有二龍潭禱雨多應稍卑者曰中盤東行十餘里蔚然深秀怪石突起曰白崖日暮

則山色蒼翠。嵐氣溶溼。濛然如雨。上有古寺七十餘所。○讀史方輿紀要曰。石門鎮在薊州東六十里。山峽巖絕壁立。其中洞門。俗呼爲石門口。宋宣和五年。遼蕭幹敗宋兵於石門鎮。遂陷薊州。○釋智朴盤山志曰。感化寺有遼乾統七年碑。漁陽南抃撰文。沙門肅回書。○又曰。獨樂寺在州治西南。不知創自何代。至遼時重修。有翰林院學士承旨劉成碑。統和四年孟夏立石。其文略曰。故尙父秦王請談真大師入獨樂寺修觀音閣。以統和二年冬十月再建。上下兩級。東西五間。南北八架。大閣一所。重塑十一面觀世音菩薩像。○又曰。祐唐寺有統和五年碑。知薊州軍事判官文林郎試祕書省校書郎李仲宣撰文。沙門德麟書。○元好問中州集曰。韓繼寧仕石晉爲行軍司馬。從出帝北遷。居析津。曾孫知白仕遼爲中書令。孚爲中書門下平章事。賜田盤山。遂爲漁陽人。○郭造卿碣石叢譚曰。薊鎮三屯城東北二十五里爲芹菜山。遼進士馮唐卿於山前結廬種芹自給。故名。

○漁陽縣。○鮑邱水。

桑欽水經曰。鮑邱水從塞外來。南過漁陽縣東。又南過潞縣西。又南至雍奴縣北。屈東入於海。

○三河縣本漢臨胸縣地。

王自謹三河縣志曰。縣名三河。以地近胸河。鮑邱河。洳河三水也。○京東考古錄曰。一統志。三河在漢臨胸縣地。今考二漢書。竝無臨胸縣。唐書地理志。幽州范陽郡潞縣下云。武德二年。置臨胸縣。貞觀元年。省臨胸。而薊州漁陽郡三河。下云。開元四年。析潞縣置。故知本自一地。先合爲臨胸。後分爲三河。皆

自唐非漢也。

鶚案。明一統志之誤。亦沿襲遼史耳。

○玉田縣。○無終山。○燕昭王墓。補。○徐無山。補。○極樂院。補。

太平寰宇記曰。無終山。一名翁同山。又名陰山。在漁陽縣西北四里。神仙傳云。仙人帛仲理者。遼東人也。隱居無終山中。和神丹。又於山中作金五千斤。以救百姓。又搜神記云。無終山有陽雍伯。玉田陽雍伯。雒陽人。父母沒。葬於無終山。山上無水。雍伯汲水作義漿。行者皆飲之。三年。有一人就飲。以石子一升遺之。使於高平好地。有石處種之。有徐氏者。爲右北平著姓。有女人多求之。不許。雍伯試求。徐笑以爲狂。乃云。以白璧一雙。當可爲婚。雍伯至種石處。得五雙白璧。徐氏大驚。卽以女妻之。○王大智。玉田縣志曰。燕昭王墓在無終山。九州記。古漁陽北無終山。上有昭王墓。○薊州志曰。徐無山在玉田縣城東北二十里。後漢田疇避難於此。開山圖載山出不灰之木。生火之石。○石邦政。豐潤縣志曰。大天宮寺在城西南。遼清寧元年。鹽監張日成建。有塔一十三級。初名南塔院。壽昌三年。賜額極樂院。至金人與宋修好。行府悉寓於此。天會五年。敕加大天宮寺。

鶚案。豐潤縣本玉田之求濟務。金大定中始置永濟縣。大安初改豐潤。

○景州清安軍下刺史。本薊州遵化縣。○松亭山。補。○獨固門。補。○石門峽。補。○溫泉。補。○禪林寺。補。張杰遵化縣志曰。松亭山。邑東北一百二十里。多古松。其峯下削。腰有洞。高二丈餘。深倍之。○水經注。

曰。沽水南出峽。夾岸有二城。世謂之獨固門。以其藉險憑固。易爲依據。巖壁斗聳。疏通若門。故得是名也。○名勝志曰。獨固門一名龍門。在縣南十里。上合下開。開處高六丈許。水自懸崖傾瀉而下。觸石成井。奔盪之聲。轟然若雷。○松亭行紀曰。石門峽在遵化西五十里。有石將軍在峽西。高二丈。水經注云。灑水又東南逕石門峽。山高嶄絕。壁立洞開。俗謂之石門口。漢中平四年。漁陽張純反。殺右北平太守劉政。遼東太守陽紘。五年。詔中郎將孟益。率公孫瓚討純。戰於石門。大破之。卽此地也。○元豐九城志曰。遵化縣福朱山下。水沸出。溫可燂雞。旁引爲池。方平如鑑。○遵化縣志曰。禪林寺。邑東北二十五里。姚秦弘始中。僧至道建。稱雲昌寺。遼重熙間。僧志紀重修。改今名。

平州遼興軍上節度。商爲孤竹國。○漢末。公孫度據有。傳子庚。孫淵。

太平寰宇記曰。孤竹城在今盧龍縣東。殷之諸侯伯夷。叔齊之國。又案縣道記云。孤竹城在肥如縣南二十里。史記謂齊桓公伐山戎。北至孤竹。又隋圖經云。孤竹城。漢靈帝時。遼西太守廉翻夢人謂己曰。余孤竹君之子。伯夷之弟。遼海漂吾棺椁。聞君仁善。願見覆藏。明日視之。見浮棺於水上。乃改葬焉。吏人嗤笑者。皆無疾而死。今改葬所尙存。祠在山下。極巖。○永平府志曰。府西北二十里。雙子山有孤竹長君墓。馬鞭山有少君墓。又五里有次君墓。卽光和之重葬也。○京東考古錄曰。晉書。平州。禹貢冀州之域。於周爲幽州界。漢屬右北平郡。後漢末。公孫度自號平州牧。及其子康。康子淵。竝據遼。東魏分遼東。昌黎。玄菟。帶方。樂浪五郡爲平州。後還合爲幽州。咸寧二年十月。分昌黎。遼東。玄菟。帶方。樂浪等郡。

國五置平州。治昌黎。是則公孫度之平州。乃遼東。而咸寧所置之平州。乃柳城。卽昌黎也。魏書營州領郡六。其一曰昌黎。晉分遼東置領縣三。其一曰龍城。太平眞君八年。并柳城。昌黎。棘城屬焉。有堯祠。榆頓城。狼水。隋書遼西郡統縣一。柳城。本魏龍城縣。開皇九年。改爲龍山縣。十八年。改爲柳城縣。而平州之名。則自魏更立於遼。西魏書平州領郡二。其一曰遼西。領縣三。其一曰肥如。獨其於平州之下。注云。晉置。治肥如城。未甚詳明。其曰晉置者。謂平州之名。始立於晉也。其曰治肥如城者。謂魏之平州。治肥如也。上下本不相蒙。且如遼西郡。下注云。秦置。亦謂遼西之名。立於秦也。豈可以秦之遼西。亦治肥如乎。以此例之。可見矣。隋唐二書。竝未有誤。至遼史於平州。遼興軍下云。漢末公孫度。據有傳子康。孫淵。是誤以拓跋氏之平州。爲公孫度之平州矣。灤州下亦云。不知其時。皆曹氏所有也。

○安喜縣。○龍紀城。補

白夏遷安縣志曰。龍紀城在縣北二十里。周圍二百四十步。遼蕭后所築。

鶚案。遼安喜縣。金大定中。改遷安。元初省入盧龍。尋復置。明初因之。

灤州永安軍中刺史。○黃洛城。○灤河。○兪兒。○扶蘇泉。○長春淀。補。○臨榆山。○榆河。○華嚴寺。補。

○卑家寺。補。○偏涼亭。補。○馮唐卿。補。

奉使行程錄曰。第十一程。自清州九十里。至灤州。州處平地。負麓面岡。東行三里許。亂山重疊。形勢險峻。河經其間。河面闊三百步。亦控扼之所也。水極清泚。臨河有大亭。名曰濯清。爲塞北之絕。○元混一。

輿地要覽曰。灤州古無之。唐末阿保機陷平營。劉守光據幽州。暴虐民不堪命。多逃亡。阿保機築此以居之。○太平寰宇記曰。黃洛城。殷諸侯之國。○能改齋漫錄曰。竇苹新唐書音訓。本紀灤河云。灤。力官切。灤水出奚國都山。諸書山海經竝無此字。惟見於切韻。又忠義列傳灤河云。音灤。今大遼平州東臨灤河是也。予案北鄙須知。大遼有灤州。西至燕京五百里。有灤河縣。西至灤州四十里。平州。西至燕京八百里。以此見灤河縣在平州之西。竇以爲在東。非也。

鶻案。灤州所統遼史止義豐馬城石城三縣。竝無灤河。北鄙須知誤也。

松亭行紀曰。案灤水前皆無名。禹貢夾右碣石入於河。注云。其水如遼。濡。溥。易皆中高不與河通。故必自北海然後能達河也。漢地理志。遼西郡肥如縣注。玄水東入濡水。濡水南入海陽。顏師古曰。濡音乃官反。遼史黃洛水北出盧龍山。南流入於濡水。而五音集韻則云。濡水名。一作溲。在遼西肥如海陽。又云。濡。奴官切。蓋音灤也。方氏通雅亦云。濡水音乃官反。今字書韻書失此音。據此。則今水有灤而無濡。且溲。灤字形相類。豈古或通用而然耶。○太平寰宇記曰。卑耳溪。隋圖經云。按管子云。齊桓公北伐孤竹。未至卑耳之溪十里。見人長尺而人物具焉。冠右祛衣。走馬疾前。管仲曰。登山之神有俞兒。霸王之君與而登山神見。且走馬前導也。祛衣。示前有水也。右祛衣。示從右方涉也。至卑耳之溪。有贊水者曰。從左方涉其深及冠。從右方涉其深及膝。已涉。桓公拜曰。仲父之聖至此。○灤志曰。甘泉在城西北十五里。味甘。秦太子扶蘇築長城。駐此飲水。又名扶蘇泉。○又曰。長春淀在州城西南一百二十里。遼蕭

太后建長春行宮。○太平寰宇記曰：臨餘山本名臨榆山，音譌爲餘，有關通胡，漢之路，在今盧龍縣東一百八十里。○灤志曰：華嚴寺在城西五十里，遼壽昌年建，卑家寺在城西南七十里，乾統年建。○又曰：偏涼亭在城東北五里，橫山頭灤河西岸，遼乾統元年建。○又曰：遼大安元年，灤馮唐卿登進士。

○馬城縣。○樂安鎮補

潘敦復樂亭縣志曰：唐開元中，置馬城縣，在今治西北，遼於今治置樂安鎮，仍屬馬城。金大定末，於樂安鎮置樂亭縣。

○石城縣。○碣石補。○姜將軍斬蛟廟補

太平寰宇記曰：石城，漢舊縣，取碣石立如城以名之。秦始皇使燕人盧生求羨門刻碣石，漢武帝登之望海，當山有大石如柱，號曰天橋柱，往往而見，立於巨海之中，狀如人造，然非人力所能成也。○太平御覽曰：大碣石山在右北平驪城西南，王莽改曰碣石也。漢昭帝亦嘗登之，以望鉅海，而勒其名於此。宛轉有石，如甬道數十里，當山頂望之，大石如柱形，往往而見，立於海中，潮水大至，及潮波退，不動不沒，不知深淺，世名之天橋柱，豈昭帝亦指此以爲碣石也。○閻若璩潛丘劄記曰：前漢志，右北平郡驪成縣有大碣石山，後漢志，遼西郡臨渝縣有碣石山，文穎漢書注，碣石山在遼西參縣，魏收地形志，肥如縣有碣石山，隋志，盧龍縣有碣石山，唐志，平州石城縣有碣石山，明一統志，碣石山在昌黎縣西北二十里，諸縣或省或改，則今之盧龍、撫寧、昌黎及灤州界耳。此山縣跨四地，故班固曰：大碣石山，今人

第因天橋柱。屬諸昌黎隘矣。○永平府志曰。元張勗灤州石城廢縣。姜將軍斬蛟廟碑云。後唐潞王從珂。濟泰間。將軍鎮榆關。碣石之石城縣。坤方山曰唐麓。趾曰唐溪。臨溪形勢幽阻。林壑疏迤。將軍卜城居之。溪有蛟。歲爲害。奔雷走電。激波溢涯。將軍領衆斬蛟於溪上。民乃安。後葬南山。冢若高山。至今民念功。建廟。將軍夫人有二。男女各七。配享。以上已誕日致祭。元至元丙子。繕祠。壬午。畢。爲記。按天贊之元。破石城。次年陷平州。置灤州。以領之。後唐天成之元。平州歸唐。三年。復陷歸遼。至清泰建元。則歷七年矣。安有唐將軍敢鎮此地。儻有之。遼事也。

○營州鄰海軍下刺史。○前燕慕容皝徙都於此。

京東考古錄曰。史言慕容皝以柳城之北。龍山之西。福德之地。乃營立宗廟宮闕。命曰龍城。一統志。柳城在永平府西二十里。龍山在府西四十里。永平府舊志。柳城在昌黎縣西南六十里。漢末爲烏桓所據。隋置縣。屬遼西郡。唐置營州。元省入昌黎爲靜安社。二說不同。案唐書。營州柳城郡下云。城西四百八十里。有渝關。守捉城。又云。西北接奚。北接契丹。通典。營州柳城郡下云。東至遼河四百八十里。南至海二百六十里。西至北平郡七百里。北至契丹界五十里。東南到安東府二百七十里。西南到北平郡七十里。西北到契丹界七十里。東北到契丹界九十里。而平州北平郡下云。東至柳城郡七百里。西至漁陽郡三百里。東北到柳城郡七百里。是柳城在今永平之東北七百里。而慕容氏之龍城。昌黎及魏以後之營州。並在其地。唐萬歲通天元年。爲契丹所陷。聖歷二年。僑治漁陽。開元五年。又還治柳城。而

今之昌黎。乃昔之廣寧縣。大定二十九年。改爲昌黎。名同而地異也。遼史載柳城曰。與中府古孤竹國。漢柳城縣地。慕容皝都之。元世祖至元七年十月己丑。降興中府爲州。以地圖按之。當在今前屯衛之北。但唐書平州下云。又有柳城軍。永泰元年置。蓋唐時柳城之地。屢被陷沒。移遷無常。此其在平州者。或卽今之靜安社。未可知。然不可以永泰元年之柳城。爲古之柳城也。

鷄案。遼史旣載慕容皝柳城於中京興中府之下。則平州所屬之營州柳城。自屬唐時僑置之名。何得復以和龍之地混之乎。明一統志及永平府志之誤。亦沿遼史。

○廣寧縣漢柳城縣。○梁忬附

元豐九域志曰。化外州河北路營州下都督柳城郡。領羈縻四州。柳城一縣。

鷄案。漢柳城當作唐柳城。

元好問遺山文集贊皇郡太君墓銘曰。夫人。姓梁氏。廣寧人。曾大父忬。遼祕書監。

遼史拾遺卷十五

志第十一地理志五

西京道

西京大同府。○元魏宮垣占城之北面。雙闕尙在。○清寧八年。建華嚴寺。奉安諸帝石像銅像。○國子監。補。○梳裏樓。補。

通鑑地理通釋石晉十六州考曰。雲州雲中郡。貞觀十四年。自朔州北定襄城。徙治定襄縣。治雲中縣。本馬邑郡。雲內之恆安鎮。武德元年。置北恆州。貞觀十四年。置定襄縣。開元十八年。更名天寶元年。曰雲中郡。升大同軍節度。會昌三年。置大同都團練使。治雲州。乾符五年。升大同都防禦使。爲節度使。○水經注曰。平城。王莽之平順也。魏天興二年。遷都於此。太和十六年。造太極殿東西堂及朝堂。夾建象魏。乾元中。陽端門。東西二掖門。雲龍。神虎。中華諸門。皆飾以觀闕。

鶚案。魏道武遷都平城。魏書在天興元年。

山西通志曰。後魏宮垣在大同府城北門外。有土臺東西對峙。蓋雙闕也。後爲天王寺。○汪承爵大同府志曰。華嚴寺在府城合和坊。遼建奉安諸帝石像銅像。計石像五。銅像六。內一銅像。袞冕垂足而坐。餘俱常服。○山西通志曰。張起巖崇文堂記云。雲中在遼金爲陪京。學卽遼國子監。宏敞靜深。冠他所。

○又曰梳裏樓在大同府城西北隅相傳遼蕭太后居此遺宇尙存。

○大同縣○方山補禪房山補

記纂淵海曰周大同川地戰國趙置雲中縣漢爲鴈門郡平城地遼置大同縣○孫體元大同縣志曰方山在城北五十里山有拓拔魏二陵及方山宮故基禪房山在城西南六十里上有寺塔創自遼

○雲中縣○紇真山補○單于臺補○高柳城參合陂補

李吉甫元和郡縣志曰紇真山在縣東三十里虜語紇真漢言三十里其山夏積霜雪○又曰單于臺在縣西北四十里漢武帝元封元年勒兵十八萬騎出長城塞登單于臺卽此也○通典曰雲中縣有故高柳城參合陂

○長青縣本白登臺地

水經注曰服虔曰白登臺名也去平城七里如淳曰平城旁之高城若丘陵矣今平城東十七里有臺卽白登臺也臺南對岡阜卽白登山也孫暢之述畫云漢高祖被圍七日陳平使人畫作美女送與冒頓閼氏恐冒頓勝漢其寵必衰說冒頓解圍於此矣

○懷仁縣○金龍山補海子補

記纂淵海曰金龍山在縣西南○又曰海子在縣東其西北有泉深不可測

○弘州博寧軍下刺史○桑乾河白道泉○火井○鷲峰寺補○楊伯通墓補○王山甫附

宣府鎮志曰桑乾河在宏州今順聖城西南二十里源出馬邑縣洪濤山下與金龍池水合流東西入盧溝河○太平寰宇記曰白道泉郡國志云白道高坂有土穴出泉卽古樂府之飲馬長城窟○又曰火山在雲中縣西五里水經注云西溪水道源火山山上有火井南北六七十步廣減尺許深不見底炎熱上升常若微雷發響以草爨之則煙騰火發其山以火從地中出亦名熒臺○山西通志曰鷲峰寺在大同府城東一百五十里舊宏州龍樹山之陽內有塔一座高一百尺遼壽昌四年建乾統三年修○宣府鎮志曰宏州有遼尙書左丞楊伯通墓○中州集曰王元節弘州人祖山甫遼戶部侍郎

○順聖縣○秋林亭補○崖木亭補

宣府鎮志曰秋林亭在順聖西城溜雲山下盛暑山石滴水成冰可消煩渴遼人建亭焉○又曰崖木亭在順聖西盤崖洞口峭壁千仞架獨木爲橋經久不朽遼人建亭其側

○德州下刺史○金河水補○白道坂

太平寰宇記曰金河水郡國志云雲中郡有紫河鎮界內有金河水其泥色紫故曰金河○又曰陰山道按冀州圖云雲中周回六十里北去陰山八十里南去通漠長城百里卽白道川也南北遠處三百里近處百里東西五百里地至良沃沙土而黑省功多穫每至七月乃熟白道川當原陽鎮北欲至山上當路有千餘步地土白如石灰色遙去百里卽見之卽是陰山路也從此以西及紫河以東當陰山北者唯此道通方軌自外道皆小而失次者多

豐州天德軍節度使。○九十九泉。○青冢。○邊貫道。附

大同志曰。官山在府城西北五百餘里。古豐州境。山上有九十九泉。流爲黑河。○明一統志曰。王昭君墓在古豐州西六十里。地多白草。此冢獨青。故名青冢。○中州集曰。邊元勳。豐州人。祖貫道。遼日狀元。

○振武縣。○黑砂磧。補

張鵬翮。漠北日記曰。距青冢十里有振武城廢址。河水齧沙。出碑曰。唐振武軍節度使墓誌。亦漢字。棄置河干。○明一統志曰。振武縣北七十里有黑砂磧。

雲內州開遠軍下節度。本中受降城地。○居延川。補。○拂雲堆。○李陵臺。補。○鷓鴣泉。補

大同府志曰。東受降城。府城西北五百餘里。中受降城。去東受降城一百餘里。本秦漢九原縣地。唐貞觀初。立雲中都督府。後置橫塞軍。遼置雲內州。西受降城。去中受降城一百餘里。古豐州西北八十里。

三受降城。皆唐朔方總管張仁愿所築。○許爾忠。朔州志曰。居延川在州北廢雲內州。一名居延澤。蘇武嘗困於此。旁有居延城。○輿地廣記曰。中受降城有拂雲堆祠。西受降城開元初爲河所圯。十年總

管張說於城東別置新城。北三百里有鷓鴣泉。○山西通志曰。李陵臺在大同府城西北五百里。古雲內州。臺高二丈餘。唐志。雲中都護府有燕然山。山有李陵臺。蓋陵不得歸。登此以望漢。其近有拂雲堆。

堆上有祠。

天德軍。○天德山。補。○牟那山。鉗耳觜城。

明一統志曰。天德山在朔州北。漢李陵自居延行至天德山。遼太祖平党項。遂破天德。掠吏民以東。皆此地。○大同志曰。牟那山在朔州城北三百里。隋大同城舊墟在此。山近有鉗耳。鶯城。及秦長城。

奉聖州武定軍上節度。本唐新州。○兩河會。溫泉。龍門山。涿鹿山。○上花園。下花園。補

通鑑地理通釋石晉十六州考曰。新州。唐志。領縣四。永興。礬山。龍門。懷安。輿地廣記。唐末置。後唐同光二年。升威塞軍節度。通鑑。威塞軍防禦使李存矩。在同光前。○劉必紹。保安州志曰。燕尾河在州東南三十里。桑乾與洋河合流。如燕尾然。南流入盧溝橋下。一名兩河會。見遼志。○明一統志曰。溫泉在州城南一十五里。其水常溫。至冬可浴。○保安州志曰。龍門山在州西北三十里。○明一統志曰。涿鹿山在州城西南九十里。一名獨鹿山。涿水出焉。黃帝破蚩尤於涿鹿。卽此。○又曰。上花園在州城西四十里。相傳遼蕭后種花之所。下花園在州城西三十里。亦遼蕭后置。遺址尙存。○徐蘭出塞詩云。溫。洋。二水尙潺湲。百里亭臺無一存。綠是蒺藜黃是土。上花園至下花園。

鷓鴣案。唐新州。遼改奉聖州。金升德興府。元改保安州。明初廢。永樂中。復置保安州。

○礬山縣。○桑乾河。

明一統志曰。桑乾河在州城西南四十里。一名瀑水。自渾源州流至州境。與溫河。洋河合流。東南入宛平縣界。爲盧溝河。

○龍門縣。○歇馬臺。補

宣府鎮志曰。歇馬臺。龍門縣東五十里境外。遼蕭后歇馬處。遺蹟尙存。

○望雲縣。○景宗於此建潛邸。○鴛鴦泊。補

宣府鎮志曰。御莊在雲州堡。契丹耶律賢因父遇害。淪落民間。居處於此。逮穆宗受禍。國人訪賢。立爲國主。作宮室於舊居之地。號曰御莊。○又曰。鴛鴦泊在雲州堡西北一百餘里境外。周圍八十里。其水停積不流。自遼金以來。爲飛放之所。

○歸化州。○雄武軍。○上刺史。○唐升武州。○愛陽川。○炭山。○斷雲嶺。○西望山。補

通鑑地理通釋石晉十六州考曰。武州。輿地廣記。唐末置。唐志。領文德一縣。後唐長興元年。改毅州。○明一統志曰。愛陽河在炭山西北二十里。本放牧之地。深可尺餘。下有頑冰。黑色者數尺。水上有浮草。性涼。尤宜牧馬。其地又生黃花。其大如錢。發於土上。人馬蹂踐。萎悴。明日復生如新。○又曰。炭山在宣府城西一百二十里。遼人謂之陁頭。承天后輔政日。納涼此處。又山之東三十里。別建涼殿。乃遼主宗真納涼地。○宣府鎮志曰。斷雲嶺在歸化州。卽今之沙嶺。鎮城西北二十里。上有陰雲籠伏。如阻斷然。

○又曰。西望山在宣府城北三十五里。上有遼國西望山舍利碑。

○可汗州。○清平軍。○下刺史。○媯州。○古城。補○媯泉。○溫泉。○阪泉。○磨笄山。○喬山。○歷山。○應夢山。補○東

羊房。○西羊房。補

通鑑地理通釋石晉十六州考曰。媯州。媯川郡。北齊立北燕州。後周曰燕州。唐武德七年。以幽州懷戎

置北燕州貞觀八年更名治懷戎本潘縣○宣府鎮志曰古城在隆慶州東北二十里相傳爲遼蕭后所築○明一統志曰媯泉在故懷來縣西一百一十里書云釐降二女於媯汭案傳瀉水在河東縣出歷山入河此恐非是○宣府鎮志曰溫泉在可汗州今隆慶城西北三十里佛峪山中○太平寰宇記曰羹頡山黃帝祠在焉有泉湛而不流卽古阪泉也今在媯州城東二百步史記云軒轅與炎帝戰於阪泉之野○通典曰鳴雞山本名磨笄山趙襄子滅代其姊磨笄自殺因爲名代人憐之爲立祠有羣雞鳴於祠上故名鳴雞山○太平寰宇記曰磨笄山在懷戎縣東北七十里○又曰橋山有祠黃帝葬於此山海經云大荒內有軒轅臺射者不敢西向射畏軒轅故也梁湘東王臨終詩云寂然千載後誰畏軒轅臺○又曰歷山後魏輿地圖風土記云潘城西北三十里有歷山形似覆釜故以名之其下有瞽瞍及虞帝二祠○宣府鎮志曰應夢山在隆慶州城北二十里遼蕭后嘗應夢建寺於其巔因名○又曰東羊房隆慶州城北十里西羊房隆慶州城西北十五里皆蕭后養羊之所

○懷來縣○團蕉亭補○雪興亭補○碧桃亭補○養鵝池補

宣府鎮志曰團蕉亭在懷來蕭后遊息之所○又曰雪興亭蕭后每冬遊至此亦在懷來○又曰碧桃亭去雪興亭里許亦蕭后所置廢久惟遺扁石刻尙存○又曰養鵝池去懷來城二十里水四時不竭相傳遼蕭后所鑿

鶚案明一統志及宣府鎮志所載蕭后皆承天太后也興宗奉太后嘗納涼於炭山故西京諸處遺

蹟爲多。

○儒州縉陽軍中刺史。○南溪河、沽河、宋王峪。○統幕補。

通鑑地理通釋石晉十六州考曰：儒州輿地廣記、唐末置九域志、領晉德一縣。廣記、縉山縣、朝野雜記、

晉山縣距燕京百八十里。○明一統志曰：溪河源自永寧縣界團山，流經州南，合沽河，西至懷來，入桑

乾河。○又曰：沽河源自州城東北雙營，西南流入溪河。○宣府鎮志曰：宋王峪在儒州，劉武周號宋金

剛爲宋王，疑以此名峪。○姜南蓉塘詩誌曰：統幕之地，在隆慶州西南八十里，相傳遼主遊幸，嘗張大

幕於此，因名。今譌爲土木。正統十四年，王師敗績於土木，大駕北狩，卽此地。

鶚案：歸化州，元明時爲宣府鎮，嬀州，明爲隆慶州，儒州，明爲隆慶州永寧縣地。

○縉山縣。○縉陽山。補。○縉陽觀。補。

謝庭桂隆慶州志曰：縉陽山在永寧縣城北十三里，一名龍安山。○又曰：縉陽觀在縉陽山，遼時所建，

今山頭仙壇，溪邊釣跡猶存。

蔚州忠順軍上節度。○川曰漚夷。○馬頭山。補。○代王城。補。○金河十寺。補。○漢文帝廟。補。○天池廟。附。

通鑑地理通釋石晉十六州考曰：蔚州後魏置懷荒，禦夷二鎮及靈丘郡。後周置蔚州，隋屬鴈門，上谷

二郡，鴈門之靈丘，上谷之飛狐。唐武德六年，置貞觀五年，破突厥，復故地。天寶曰安邊郡，至德曰興唐

郡，領靈丘、飛狐、興唐三縣。○太平寰宇記曰：嘔夷水一名澗水，出靈丘縣西北，高是山，周禮曰并州，其

川嘔夷。謂此也。亦曰瓠。瓠河。上槽狹。下流闊。形似瓠。因名。○劉生和蔚州志曰。馬頭山在城東南三十里。一名大白山。山有奇石。形如馬頭。○山西通志曰。代王城在蔚州東二十里。漢文帝封代時居此。西北四里有薄家莊。卽其母薄太后所居也。○又曰。金河十寺在蔚州東南八十里。五臺山下。河中碎石如金。故名金河。寺俱遼統和間建。○蔚州志曰。漢文帝廟在蔚州南關。遼穆宗建石碣存焉。○元和郡縣志曰。天池在靜樂縣北燕京山上。周回八里。陽旱不竭。陰霖不溢。故老言。嘗有人乘車。風飄墮地。有人獲車輪於桑乾泉。後魏孝文帝以金珠穿魚七頭。放此池。後亦於桑乾泉得之。隋煬帝嘗於池南置宮。每夜風雨吹破。宮竟不成。今池側有祠。謂之天池祠。○玉海曰。嘉祐元年。蕭扈來賀正。言陽武寨天池廟侵北界。詔館伴使玉洙持圖道本末。○後山談叢曰。潘美爲并帥。代之北都山。有天池焉。歲遣通判祭之。其後憚遠而罷。久之。契丹遣祭焉。又易其屋記。至熙寧中。始有其地。凡數歲。兩使往來。率不能辨而與之。

鶡案。天池廟屬宋憲州境。以其後入遼。故附於此。

○靈仙縣○倒刺山補

元和郡縣志曰。倒刺山在縣東七十里。亦號雪山。俗傳靈仙所居。與五臺山略等。

鶡案。本唐興唐縣。晉改靈仙。殆以倒刺山得名耳。

○飛狐縣○飛狐口補

太平寰宇記曰。隋仁壽元年。改廣昌縣爲飛狐縣。因縣北飛狐口爲名。○又曰。飛狐道自縣北入媯州懷戎縣界。卽古飛狐口也。漢書酈食其說漢王曰。杜白馬之津。塞飛狐之口。此皆言一方之險也。又晉中興書云。建興中。劉琨自代出飛狐口。奔於安次。謂此道也。

○靈丘縣。○太白山補。○隘門山補。○開皇長城補。○趙武靈王墓補。

元和郡縣志曰。太白山在縣南十里。山有鍾乳穴。其深不測。仰望穴中鍾乳。如懸穗焉。○又曰。隘門山亦曰隘口。在縣東南五十里。壁立直上。層崖刺天。有古道極陰。後魏明元帝置義倉之所。○又曰。開皇長城。西自繁時縣經縣北七十里。東入飛狐縣界。○輿地廣記曰。靈丘縣有趙武靈王墓。因以爲名。

應州彰國軍上節度。○後唐明宗。州人也。天成元年。升彰國軍節度。與唐軍。寰州隸焉。○北龍首山。南鴈門。○鴈門水補。○金鳳城補。○佛宮寺補。

通鑑地理通釋石晉十六州考曰。應州。續通典。故屬大同軍節度。輿地廣記。唐末置。領金城。渾源二縣。○又曰。寰州。職方考。後唐明宗置。輿地廣記。唐末置。領寰清一縣。○大同志曰。龍首山在應州城北山之南。跨雲中。鴈門山在應州城南山之北。與龍首山相望。○水經注曰。鴈門之水。出於鴈門之山。鴈出其門。在高柳北。東南流。逕高柳縣。故城北。舊代郡治。○冊府元龜曰。後唐明宗以咸通八年九月生於代北之金鳳城。○大同府志曰。金鳳城在應州城東北。天王祠前。後唐明宗生此。中有金鳳井。○記纂淵海曰。金鳳井在州治。相傳李克用生時。金鳳自井中飛出。

鷄案明宗生應州見遼史潘自牧以爲晉王克用恐非

談遷棗林雜俎曰應州治西佛宮寺遼清寧二年田和尚奉敕立有釋迦塔高三百六十尺圍半之六
簷角上下皆巨木爲之層如樓閣玲瓏宏敞

○渾源縣○渾源川○恆山補○溫泉補

郭子章郡縣釋名曰唐置渾源縣因八水合而渾流故名八水崞川水瀛水黑龍池神溪水李峪水乳
泉水陵雲口水磁窰口水是也○明一統志曰恆山在渾源州南二十里卽北嶽也水經謂之玄嶽其
山高侵霄漢舜北巡守至於恆山卽此○恆岳志曰恆山北岳也括地志曰有五別名蘭臺府列女宮
華陽臺紫臺太乙宮釋家謂之青峰埵道家謂之總元洞天金城福地又曰太乙洞天應劭風俗通曰
恆常也萬物伏北方而有常也山脈發崑崙其東北一支自積石而北入匈奴東爲陰山又南入雲中
境西折而東爲寧武之天池代之鴈門句注又東爲覆宿夏屋茹越書崖突起於渾源之南爲恆山○
潛丘劄記曰舜典十有一月朔巡守至於北岳傳曰北岳恆山禹貢太行恆山疏曰恆山在上曲陽西
北爾雅兼殷制釋山曰河北恆周禮職方氏正北曰并州山鎮曰恆山注曰恆山在上曲陽則舜當日
早覲北諸侯於今曲陽大茂山之下非山經所稱今渾源之北岳水經注所稱之玄岳歷歷可知
鷄案沈括夢溪筆談云北岳常岑謂之大茂山者是也半屬契丹以大茂山分脊爲界岳祠舊在山
下石晉之後稍遷近裏今其地謂之神棚則北岳自在上曲陽遼史故無渾源之祀也

王濬初渾源州志曰。溫泉在州東南一百里。其水若湯。浴之能愈疾。

朔州順義軍下節度。○馬邑城補。○統萬城補。○元姬山補。○白樓補。

通鑑地理通釋石晉十六州考曰。朔州馬邑郡。魏武帝置新興郡。晉改晉昌。後魏置懷朔鎮及朔州。隋爲馬邑郡。領善陽馬邑二縣。○太平寰宇記曰。馬邑城。卽今州城是也。搜神記云。昔秦人築地於武周塞內。以備胡。城將成而崩者數矣。忽有馬馳走。周旋反覆。父老異之。因依走跡以築城。城乃不崩。遂名馬邑。○元混一輿地要覽曰。統萬城。赫連勃勃於無定河北黑水之南築。○朔州志曰。元姬山。州北三十里。後魏道武侍姬李姓善謳。卒葬此山。故名。○又曰。白樓在古城內東北。後魏納秦姚興女爲后。建此樓以望故國。飾以鉛粉。因名。

○鄜陽縣。○句注山補。

元和郡縣志曰。句注山在縣東八十里。○朔州志曰。句注塞。趙襄子以其姊爲代王夫人。欲并代。約代王遇於此。

○馬邑縣。○鴈門關補。

記纂淵海曰。鴈門關在馬邑縣東七十里。

○武州宣威軍下刺史。

輿地廣記曰。毅州本武州。唐末置。後唐長興元年。改曰毅州。

東勝州武興軍下刺史。○君子津補

記纂淵海曰：君子津在古東勝州界。漢時有大賈齋金行至此死，津長埋之。後其子至，悉以金付之。因名。

○河濱縣。○河濱關補

明一統志曰：河濱廢縣在大同府城西五百餘里。隋榆林縣地。唐析置此縣，屬勝州。縣東北有河濱關。後廢。遼復置，屬東勝州。

志第十三麻象志中

閏考

太康三年閏十二月。宋閏來年正月異。

能改齋漫錄曰：神宗元豐元年歲在戊午，閏正月。時知定州薛向繳大遼國所印歷日，稱閏月乃在十二月。與本朝不同。乞送司天監重定。時議者以兩朝賀正之禮爲疑，而臺章以爲正朔爲大，賀正爲小。兩朝之閏不同，卽不過本朝之使先期而賀正於彼，彼國之使後期而賀正於此，料彼必不肯改以就此。則本朝豈可改而就彼乎？其後本朝竟不能改。

志第十四麻象志下

朔考。○冬至附

重熙四年十一月朔。宋辛巳。十二月朔。宋辛亥。

江休復嘉祐雜志曰。己亥曆日十一月大盡。契丹曆此月小。十二月十四夜才昏。月蝕。戎使言竊謂爲已望。

鶚案。前己亥。宋之咸平二年。遼之統和十七年。時未通使也。後己亥。宋宣和元年。遼之天慶九年。此時金伐遼。使命阻絕矣。此己亥應作乙亥。宋仁宗景祐二年。

石林燕語曰。蘇子容過省。賦麻者天地之大紀。爲本場魁。既登第。遂留意麻學。元豐中。使契丹。適會冬至。契丹麻先一日。趨使者入賀。虜人不禁天文術數之學。往往皆精。其實契丹麻爲正也。然勢不可從。子容乃爲汎論麻學。援據詳博。虜人莫能測。不能遽折。歸奏。神宗大喜。卽問二麻孰是。蘇以實言。太史皆坐罰金。元祐初。遂命子容重修渾儀。○張邦基墨莊漫錄曰。蘇子容丞相。博學無所不通。熙寧十年。爲大遼生辰國信使。在虜中。適遇冬至。時本朝麻先北朝一日。北朝麻後一日。北人問公孰是。公曰。麻家算術小異。遲速不同。謂如亥時。節氣當交。則猶是今夕。若踰數刻。卽屬子時。爲明日矣。麻家布算。容有遲速。或先或後。故有一日之異。然各從本朝之麻可也。北人深以爲然。遂各以其日爲節慶賀。使還奏之。上喜曰。朕思之。此最難處。卿之所對極中事理。

志第十五百官志一

十二官職名總目

武溪集契丹官儀曰。胡人十宮院使者。自阿保機而下。每主嗣位。即立宮置使。領臣寮。每歲所獻生口。及打虜外國所得之物。盡隸宮使。每宮皆有戶口錢帛。以供虜主私費。猶中國之內藏也。十宮院使在上將軍之下。節度使之上。

志第十六百官志二

北面軍官

武溪集契丹官儀曰。契丹司錄事司。如中國之府司。左右司候司。掌刑獄。遼人於燕京置元帥府。統軍馬軍。步軍三司。胡人東有渤海。西有奚。南有燕。北據其窟穴。四姓雜居。舊不通婚。謀臣韓紹芳獻議。乃許婚焉。衣服飲食言語。各從其俗。凡四姓相犯。皆用漢法。本類自相犯者。用本國法。故別立契丹司以掌其獄。

志第十七上百官志三

南面朝官

五代史曰。契丹滅晉。其母述律遣人齋書及阿保機。明殿書賜德光。明殿若中國陵寢下宮之制。其國君死葬。則於其墓側起屋。謂之明殿。置官屬職司。歲時奉表起居如事生。置明殿學士一人。掌答書詔。每國有大慶弔。學士以先君之命。爲書以賜國君。其書常曰。報兒皇帝云。○春明退朝錄曰。契丹有乾文閣待制。

志第十七下百官志四

上京鹽鐵使司。○東京戶部使司。○中京度支使司。○南京三司使司。○西京計司。

武溪集契丹官儀曰。胡人司會之官。雖於燕京置三司使。惟掌燕、薊、涿、易、檀、順等州錢帛耳。又於平州置錢帛司營、灤等州屬焉。中京置度支使。宜、霸等州隸焉。東京置戶部使。遼、西、川、錦等州屬焉。上京置鹽鐵使。饒、澤等州隸焉。山後置轉運使。雲、應等州隸焉。置使雖殊。其實各分方域。董其出納也。隨駕賜予。則樞密院主之。讌勞。則宣徽使主之。

佐吏補

文獻通考曰。契丹內外官多倣中國者。其下佐吏。則有斂史、木古思奴、古都奴、古徒奴。

鶚案。百官志。夷窩畢院有斂史。遙輦九帳大常袞司有斂史。其下三職。史未載也。

志第十八禮志一

吉儀

柴册儀

燕北錄曰。清寧四年戊戌歲十月二十三日。戎主一行起離韓甸。往西北烏二百七十餘里。地名永興。旬行柴册之禮。於十一月一日先到小禁圍內宿泊。於二日先於契丹宮內選擇九人。與戎主身材一般大小者。各賜戎主所著衣服一套。令結束九人。假作戎主。不許別人覺知。於當夜子時。與戎主共十

人相離出小禁圍。入大禁圍內。分投各一帳。每帳只有蠟燭一條。椅子一隻。竝無一人。於三日辰時。每帳前有契丹官僚一員。各自入帳。列何骨騰。漢語。提認天子也。若提認得戎主者。宜賜牛羊駝馬各一千。當日宋國大王。戎主親弟。於第八帳內。提認得戎主。番儀須得言道。我不是的皇帝。其宋國大王卻言道。你的是皇帝。如此往來番語三徧。戎主方始言道。是便是。出帳來著箱內番儀衣服畢。次第行禮。先望日四拜。又拜七祖殿。次拜木葉山神。次拜金神。次拜册太后。次拜赤孃子。次拜七祖眷屬。次上柴籠受册。次入黑龍殿受賀。當日行禮罷。與太后、太叔出大禁圍。卻入小禁圍內。與近日番漢臣僚夜宴。至三更退。四日歇泊。至五日。卻來鞞甸受南朝禮物。小禁圍在大禁圍外東北。內氈帳二十三座。大禁圍圍無一面。長一百一十步。內有氈帳十座。黑氈兵幕七座。大小禁圍外有契丹兵甲一萬人。各執槍刃。旗鼓弓箭等。旗上錯成番書册字。漢語。正軍字。七祖者。太祖、太宗、穆宗、景宗、聖宗、興宗也。赤孃子者。番語謂之掠胡奧倭。傳是陰山七騎所得。潢河中流下一婦人。因生其族類。其形木彫彩裝。常時於木葉山廟內安置。每一新戎主行柴册禮時。取來作儀注。第三日送歸本廟。七祖眷屬俱是木人。著紅錦衣。亦於木葉山廟內取到。柴籠之制高三十二尺。用帶皮榆柴疊成。上安黑漆木壇三層。壇安御帳。當日戎主坐其中。下有契丹臣僚二百餘人。

鷄案。王易所記柴册儀。與史志不同。存以備考。

志第二十禮志四

寶儀。

宋使賀生辰正旦。

歐陽修居士集皇帝賀契丹皇帝正旦書曰。正月一日。伯大宋皇帝致書於姪大契丹聖文神武睿孝皇帝闕下。玉厯正時。布王春而茲始。寶鄰敦契。講信聘以交修。方履新陽。益綏多福。其於祝詠。罔罄敷言。今差朝散大夫守太常少卿上騎都尉渤海縣開國男食邑三百戶賜紫金魚袋吳中復。供備庫使銀青崇祿大夫檢校太子賓客兼御史大夫騎都尉廣平縣開國男食邑三百戶宋孟孫充正旦國信使副。有少禮物。具諸別幅。專奉書陳賀不宣。謹白。○又皇帝賀契丹太皇太后正旦書曰。正月一日。姪大宋皇帝謹致書於嬪大契丹仁慈聖善欽孝廣德安靜正洎懿和寬厚崇覺儀天太皇太后闕下。歲律更新。春陽暢達。因履端之叶吉。敦永好以申歡。載惟慈懿之和。方集壽康之祉。更希善攝。用副遐悰。今差朝散大夫守太常少卿直昭文館護軍廣陵縣開國子食邑五百戶賜紫金魚袋呂景初。洛苑使兼閣門通事舍人銀青崇祿大夫檢校太子賓客兼御史大夫騎都尉清河郡開國侯食邑一千七百戶張利一。充正旦國信使副。有少禮物。具諸別幅。專奉書使賀不宣。謹白。○王安石臨川集皇帝問候大遼皇帝書曰。嘉生備舍。華歲幾終。惟素講於鄰懽。想具膺於時福。彌加葆衛。永御吉康。○又皇帝賀大遼皇太后生辰書曰。玉燭告和。方御閉藏之候。椒庭集慶。載鄰誕毓之辰。具飭使車。肅將禮幣。式修舊好。申祝永年。○契丹國志曰。宋朝賀契丹生辰禮物。契丹帝生日。南宋遺金酒食茶器三十七件。衣

五襲金玉帶二條。烏皮白皮鞞二編。紅牙笙笛。箏拍板。鞍勒馬二匹。纓複鞭副之。金花銀器三十件。銀器二十件。錦綺透背雜色羅紗綾縠絹二千匹。雜綵二千匹。法酒三十壺。的乳茶十觔。岳麓茶五觔。鹽蜜果三十罐。乾果三十籠。正旦則遣以金花銀器白銀器各三十件。雜色羅綾紗縠絹二千匹。雜綵二千匹。○又曰。宋朝皇帝生辰。北朝所獻。刻絲花羅御樣透背御衣七襲。或五襲。七件。紫背貂鼠翻披。或銀鼠鵝項鴨頭衲子。塗金銀裝箱。金籠水精帶。銀匣副之。錦緣帛皺皮鞞金玦。京阜白熟皮鞞。細錦透背清平內裝御樣合綫樓機綾共三百匹。塗金銀龍鳳鞍勒紅羅匣金鞞繡方鞞一具。白楮皮黑銀鞍勒氈。二具。錄褐楮皮鞍勒海豹皮鞞二具。白楮皮黑裏筋鞭一條。紅羅金銀綫繡雲龍銀器仗一副。黃禪皮纏楮皮弓一紅。錦袋阜鵬翎獬角。頭箭十。法清法麴麴酒二十壺。蜜曬山果十束。樞椀蜜漬山果十束。樞皮列山梨柿四束。樞榛栗松子郁李黑郁李子麩棗楞梨棠梨二十箱。麩杭糜梨。麩十椀。蕪荳白鹽十椀。青鹽十箱。牛羊野豬魚鹿腊二十二箱。御馬六匹。散馬二百匹。正旦御衣三襲。鞍勒馬二匹。散馬一百匹。國母又致御衣綴珠貂裘鈿錦刻絲透背合綫御綾羅綺紗縠御樣果實雜。秒腊肉。凡百品。水晶鞍勒新羅酒青鹽。國主或致戎器寶鐵刀。鷲禽曰海東青之類。承天節。又遣庖人持本國異味。前一日就禁中造食以進御云。

高麗使入見儀

契丹國志曰。高麗國貢進物件。金器二百兩。金抱肚一條。五十兩。金沙鑼五十兩。金鞍轡馬一匹。五十

兩紫花絛紬一百匹。白絛紬五百匹。細布一千匹。麤布五千匹。銅器一千斤。法清酒醋共一百餅。腦元茶十斤。藤造器物五十事。成形人參不定數。無灰木刀櫛十箇。細紙墨不定數目。橫進物件。秣米五百石。稷米五百石。織成五采御衣不定數。○又曰。契丹每次回賜物件。犀玉腰帶二條。細衣二襲。金塗鞍轡馬二匹。素鞍轡馬五匹。散馬一十四匹。弓箭器仗二副。細錦綺綾羅二百匹。衣著絹一千匹。羊二百口。酒果子不定數。竝命刺史已上官充使一行六十人。直送入本國。○又曰。契丹賜奉使物件。金塗銀帶二條。衣二襲。錦綺三十四匹。色絹一百匹。鞍轡馬二匹。散馬五匹。弓箭器仗一副。酒果不定數。上節從人白銀帶一條。衣一襲。絹二十四匹。馬一匹。下節從人衣一襲。絹十四匹。紫綾大衫一領。

西夏國進奉使朝見儀

契丹國志曰。西夏國貢進物件。細馬二十匹。麤馬二百匹。駝一百頭。錦綺三百匹。織成錦被褥五合。菘菘甘石井鹽各一千斤。沙狐皮一千張。兔鶻五隻。犬子十隻。本國不論年歲。惟以八節貢獻。○又曰。契丹回賜除羊外。餘竝與高麗國同。惟玉帶改爲金帶。勞賜人使亦同。

志第二十二禮志六

嘉儀下

立春儀 ○賜幡勝

韓琦安陽集使契丹謝春槃幡勝狀曰。緹律回春。青陽戒節。鏤勝俯遵於俗尙。雕槃榮錫於時珍。上荷

恩私至深銘刻。

日月蝕補

燕北錄曰。契丹如見月蝕。各備酒饌相賀。戎主次日亦有宴會。如日蝕。卽盡望而唾之。仍背日坐。

志第二十三樂志

國樂。

文獻通考曰。契丹有譚子部百人。夜以五十人番直。四鼓將盡。歌於帳前。號曰聒帳。每謁拜木葉山。卽射柳枝。譚子唱番歌前導。彈胡瑟和之。已事而罷。

大樂調雅樂有七音。大樂亦有七聲。謂之七旦。

野獲編曰。自北劇興。名男爲正末。女曰旦兒。相傳入於南劇。雖稍有更易。而旦之名不改。竟不曉何義。今觀遼史樂志。大樂有七聲。謂之七旦。凡一音管一調。如中宮越調。大食中呂之屬。此外又有四旦二十八調。不用黍律。以琵琶叶之。按此卽今九宮譜之始。所謂旦。乃司樂之總名。以故金元相傳。遂命歌妓領之。因以作雜劇。流傳至今。且皆以娼女充之。無則以優之少者假扮。漸遠而失其真耳。

大樂聲各調之中。度曲協音。其聲凡十。

野獲編曰。今按樂者必先學笛曲。如五、凡、工、尺、上、一之屬。世以爲俗工俚習。不知其來舊矣。宋樂書云。黃鍾用合字。大呂。太簇用四字。夾鍾。姑洗用一字。夷則。南呂用工字。無射。應鍾用凡字。中呂用上字。蕤

實用句字。林鍾用尺字。黃鍾清用六字。大呂夾鍾清用五字。又有陰陽半陰半陽之分。而遼世大樂聲各調之中。度曲協音。其聲凡十。曰五。凡。工。尺。上。一。四。六。句。合。近十二雅律。於律呂各闕其一。以爲猶雅音之不及商也。可見宋遼此調已爲之祖。

曲宴宋國使樂次。○酒九行。歌角觥。

畫墁錄曰。北虜待南使。樂列三百餘人。舞者更無回旋。止於頓挫伸縮手足而已。角觥以倒地爲負。兩人相持終日。欲倒而不可得。又物如小額。通蔽其乳。脫若褻露之。則兩手覆面而走。深以爲恥也。

志第二十五儀衛志二

國服。

臣僚戴氈冠。○鞞鞞帶。

契丹國志曰。番官戴氈冠。上以金華爲飾。或加珠玉翠毛。蓋漢魏時遼人步搖冠之遺象也。○孟元老東京夢華錄曰。正旦大朝會。大遼大使頂金冠。後檐尖長。如大蓮葉。服紫窄袍。金鞞鞞。副使展裏金帶。如漢服。○夢溪筆談曰。帶衣所垂蹠躡。蓋欲佩帶弓劍。斲斲算囊刀礪之類。○契丹國志曰。丈夫或綠巾。綠花窄袍。中單多紅綠色。貴者被貂裘。貂以紫黑色爲貴。青色爲次。又有銀鼠。尤潔白。賤者被貂毛。羊鼠沙狐裘。弓以皮爲弦。箭削樺爲箠。鞞勒輕快。便於馳走。以貂鼠或鵝項鴨頭爲捍腰。

徐呂皮補

演繁露曰。今使北者。其禮例中所得。有韋而紅。光滑可鑒。問其名。則徐呂皮也。問何以名之。則曰。徐氏呂氏二氏。實工爲之也。此說信否。殊未可知。予案燕北雜記曰。契丹興宗嘗禁國人服金玉犀帶。及黑斜喝里皮。并紅虎皮鞞。及道宗卽位。以爲鞞帶也者。用之可以華國。遂弛其禁。再許服用。此卽鞞帶之制矣。及問徐呂皮所自出。則曰。黑斜喝里皮。謂回紇野馬皮也。用以爲鞞。騎而越水。水不透裏。故可貴也。紅虎皮者。回紇獐皮也。揉以礪砂。其輭熟。用以爲鞞也。本此而言。則知徐呂皮者。斜喝里聲之轉也。然斜喝里之色黑。而徐呂皮之色紅。恐是野馬難得。而礪砂熟韋。可以常致。故染而紅之。以當獐皮。爲欲高其名品。遂借斜喝里以爲名呼也。

兔鶻帶補

契丹國志曰。契丹重骨咄犀。犀不大。萬株犀無一不曾作帶。紋如象牙。帶黃色。止是作刀櫛。已爲無價。天祚以此作兔鶻。中國謂之腰條皮。插頭垂者。

婦人服補

鷓案。金史輿服志曰。婦人服襜裙。多以黑紫上編繡全枝花。周身六襞積。上衣謂之團衫。用黑紫或阜及紺直領左衽。掖縫兩旁。復爲雙襞積。前拂地。後曳地尺餘。帶色用紅黃。前雙垂。至下齊。年老者以阜紗籠髻如巾狀。散綴玉鈿於上。謂之玉逍遙。此皆遼服也。金亦襲之。

志第二十六儀衛志三

符印
傳國寶

唐玄宗唐六典曰符寶郎掌天子八璽其一曰神寶二曰受命寶其神寶方六寸高四寸六分厚一寸七分蟠龍紐文與傳國璽同傳國璽秦皇以藍田玉刻之李斯篆文方四寸面文曰受命於天既壽永昌紐盤五龍二寶歷代相傳以爲神器別有六寶一曰皇帝行璽二曰皇帝之璽三曰皇帝信璽四曰天子行璽五曰天子之璽六曰天子信璽此六璽因文爲名竝白玉螭虎紐歷代傳受或亡失則補之○續通典曰秦兼六國稱皇帝購取藍田之玉玉工孫壽刻之方四寸李斯爲大篆書之形製如龍魚鳳鳥之狀希世之至寶也秦亡子嬰以璽降漢漢世傳寶之王莽之篡求璽於元后后投之於階一角微缺莽誅歸之更始更始敗歸之盆子及熊耳之敗盆子以璽降光武漢末黃巾亂投璽於井孫堅入洛見井有五色氣取得之以歸袁術術敗荊州刺史徐璆得之詣許以進獻帝魏受漢禪得之以傳於晉洛陽之陷劉聰得之劉曜爲石勒所禽璽歸於鄴石氏之亂冉閔得之閔敗晉將戴施入鄴得之送江東傳之宋齊梁臺城之破侯景得之景敗其將侯子鑒以璽走爲追兵所迫投於棲霞寺井中僧永杼得而匿之陳永定二年永弟子普智以璽上陳文帝隋平陳始得秦真傳國璽煬帝江都之禍宇文化及得之化及敗璽歸竇建德建德敗其妻曹氏以璽獻於唐唐禪楊涉送寶於大梁莊宗滅梁得之同光末內難作寶爲火灼文字譌缺明宗得之清泰敗以寶隨身自焚而死寶遂亡其神璽者方六

寸厚一寸七分。高四寸六分。蟠龍隱起。文與傳國璽同。但玉色不及形制高大耳。不知何代製造。東晉孝武十九年。雍州刺史郗恢得之。慕容永送於金陵。傳之宋。齊梁臺城之破。侯景得之。景敗。侍中趙思齊攜走江北。獻之齊文宣帝。宇文弼齊得之。宇文亡。入隋。隋文帝改號傳國璽。仍以秦璽後出。得於亡陳。以北朝所傳神璽爲第一。秦璽次之。隋亡。竇建德妻與傳國璽俱獻長安。唐末不知所在。○鄭文寶傳國璽譜曰。後唐明宗崩。璽歸清泰。晉高祖擁戎馬入洛。河橋不守。清泰積薪累日。盡驅六宮珍玩。一旦偕焚於摘星樓。秦璽煨燼。其亦明矣。按陷蕃記。北戎入梁園。晉少主奉上璽。戎主怪玉璽。制用疏樸不工。文非真紐。疑將有隱易者。晉人具以實對。文寶淳化中。司計陝右。督軍芻於塞下。有乾州永壽縣主簿趙應良者。北燕人。自謂少年事戎。爲丞相高公堂後官。嘗從公至燕子城。登重閣。閱晉舊物。得觀璽。與陷蕃記略同。○五代會要曰。傳國寶自秦始皇後。歷代傳受。至唐末帝自燔之際。以寶隨身。焚焉。晉高祖受命。特製寶一座。文曰。皇帝神寶。開運末。北戎齋以入蕃。○珩璜新論曰。石晉再作受命寶。文曰。受天明命。惟德永昌。契丹盜而取之。○李心傳建炎以來朝野雜記曰。秦璽者。李斯之魚蟲篆也。其圍四寸。至漢謂之傳國璽。子嬰所封。元后所投。王憲所得。赤眉所上。皆是物也。董卓之亂。失之。吳書謂孫堅得之。洛陽甄官井中。後爲袁術所奪。徐璆得而上之。殆不然也。若然。魏氏何不寶而用之。而自刻璽乎。厥後歷世皆用其名。永嘉之亂。沒於劉石。永和之世。復歸江左者。晉璽也。魏氏有國。刻傳國璽如秦之文。但秦璽讀自右。魏璽讀自左耳。晉有天下。又自刻璽。其文曰。受命於天。皇帝壽昌。本書與

服志乃以爲漢所傳秦璽。誤實甚矣。此璽更劉聰、石勒、逮石祗死。其臣蔣幹求援於謝尚。乃以璽送江南。王彪之辨之。亦不云秦璽也。太元之末。得自西燕。更涉六朝。至於隋代者。慕容燕璽也。晉孝武太元十九年。西燕主永求救於郗恢。并獻玉璽一紐。方闊六寸。高四寸六分。文如秦璽。自是歷宋、齊、梁。皆寶之。侯景既死。北齊辛術得之。廣陵獻之高氏。後歷周、隋。皆誤指爲秦璽。後平江南。知其非是。乃更謂之神璽焉。劉裕北伐。得之關中。歷晉暨陳。復爲隋有者。姚秦璽也。晉義熙十三年。劉裕入關。得傳國璽。而上之大四寸。文與秦同。然隱起而不深刻。隋滅陳。得此。指爲真璽。遂以宇文周所傳神璽爲非。是識者謂古璽深刻。以印泥。後人隱起。以印紙。則此隱起者。非秦璽。姚氏取其文作之耳。開運之亂。沒於耶律女真。獲之。以爲大寶者。石晉璽也。唐太宗貞觀十六年。刻受命璽。文曰。皇帝景命。有德者昌。後歸朱全忠。及從珂自焚。璽亦隨失。德光入汴。重貴以璽上之。云先帝所刻。蓋指敬瑄也。蓋在當時。皆誤以爲秦璽。而秦璽之亡。則已久矣。

鶚案。秦璽之說非一。璽已焚於後唐。遼所得者。乃晉璽耳。史稱興宗重熙七年。以有傳國璽者爲正。統賦試進士。豈當時亦未之深考耶。

金印三。晉帝所上。其文未詳。

周必大省齋文臺題五代應順年當檢臨本曰。右後唐宰臣劉昫兼判三司堂檢。其內批用御前新鑄之印。予從洪景廬待制借本臨之。案應順元年三月戊辰。愍帝遜於衛。必以印寶自隨。四月壬申。從珂

入洛乙亥卽位。殆倉卒鑄此印耶。乙酉大赦。改元清泰。時愍帝已殂。璽應來歸。後十餘年。晉出帝奉玉璽金印歸契丹。契丹謂璽非工。與前史所傳異。命求真璽。出帝曰。從珂自焚。玉璽不知所在。疑焚之事。載晉家人傳。所謂金印亦新鑄之類耳。

符契。

銀牌。○木刻子牌。補

燕北錄曰。銀牌有十三道。上是番書朕字。用金鍍鍛成。見在內侍左承宣宋璘處收掌。用黑漆匣盛。每日於戎主前呈奉一徧。或有緊急用事。宜用此牌帶在項下。於南北大王處抽發兵馬。餘事卽不用。○使遼錄曰。銀牌形如方響。刻番書宜速二字。使者執牌馳馬。日行數百里。牌所至如國主親到。需索更易。無敢違者。○燕北錄曰。長牌七十二道。上是番書敕走馬字。用金鍍鍛成。見在南司內收掌。每遇下五京等處取索物色。及進南朝野味鹿茸果子。以此牌信帶在腰間走馬。又木刻子牌。約有一十二道。上是番書急字。左面刻作七刻。取其本國歷七世也。右面刻作一刻。旁是番書永字。其字用金鍍銀葉陷成。長一尺二寸已來。每遇生女真。達靺鞨國取要物色。抽發兵馬。卽用此牌信帶在腰間左邊走馬。其二國驗以爲信。

志第二十八食貨志上

賦稅之制。

宣府鎮志曰。契丹統和十八年。詔北地節候頗晚。宜從後唐舊制。大小麥豌豆。六月十日起徵。至九月納足。正稅匹帛錢。鞵地榷麴錢等。六月二十日起徵。十月納足。○中州集曰。遼人掠中原人。及得奚。渤海諸國生口。分賜貴近。或有功者。大至一二州。少亦數百。皆爲奴婢。輸租爲官。且納課給其主。謂之二稅戶。又見金史李晏傳。○范鎮東齋紀事曰。契丹有馮見善者。予接伴勸酒。見善曰。勸酒當以其量。若不以量。如徭役而不戶等。高下也。以此知契丹徭役亦以戶等。中國可不量戶等役人邪。

志第二十九食貨志下

鼓鑄之法。

洪遵泉志曰。契丹國天贊錢。五代史四夷附錄曰。契丹主阿保機僭號。名年曰天贊。余按此錢。徑九分。重三銖六參。文曰。天贊通寶。○又曰。應厯錢。董道曰。文曰。應厯重寶。趙至忠虜廷雜記曰。穆宗改元應厯。○董道錢譜曰。統和元寶。宋太平興國八年。耶律隆緒鑄。太平元寶。宋天禧五年。耶律隆緒鑄。○泉志曰。虜廷雜記曰。聖宗卒。少主宗真立。改元景福。一年。又改重熙。余按此錢。徑九分。重三銖。文曰。重熙通寶。○陳昉虜廷須知曰。契丹主洪基。改元清寧。按此錢。徑九分。重三銖。文曰。清寧通寶。○泉譜曰。咸雍通寶。宋治平二年。耶律洪基鑄。○泉志曰。徐兢高麗國經曰。契丹咸雍十年。改大康。至十年。改元大安。余按此錢。有二品。竝徑九分。重二銖四參。以大康通寶。大康元寶爲文。

鶻案。董道錢譜。大康通寶。作大康同寶。未知孰是。

李季與東北諸蕃樞要曰。契丹主天祐年號大安。按此錢徑八分。重二銖八參。文曰。大安元寶。○又曰。契丹主天祐年號壽昌。按此錢徑九分。重二銖四參。文曰。壽昌元寶。

鶻案。道宗年號壽隆。泉志云。壽昌。正閏考亦云。遼道宗年號壽昌。見東都事略。范成大攬轡錄。又有盛昌六年。未詳何據。

北遼通書曰。天祚卽位。壽昌七年。改爲乾統。按此錢徑寸。重三銖二參。文曰。乾統元寶。○東北諸蕃樞要曰。契丹主天祚年號天慶。按此錢徑九分。重二銖四參。文曰。天慶元寶。考之虜廷雜記曰。景宗朝。置鑄錢院。年額五百貫。則契丹鑄錢舊矣。○泉志曰。千秋錢。李孝美曰。此錢徑三分。文曰。千秋萬歲。今甚易得。蓋常歲虜使入貢。人多貿易得耳。董道曰。遼國錢蓋近世所爲。

志第三十刑法志上

鐵骨朵之數。或五或七。

燕北錄曰。鐵瓜。番呼髮靺。以熟鐵打作八片。虛合。或用柳木作柄。約長三尺。兩邊鐵裹。打數不過七下。沙袋者。穆宗時置。

燕北錄曰。沙袋。番呼郭离。以牛皮夾縫。如鞵底。內盛沙半升。柄以木作胎。亦用牛皮裹。約長二尺。打數不過五百。戎主。太后寢帳內事。不論大小。若傳播出外。捉獲者。其元傳播人處死。接聲傳播人。決沙袋五百。契丹盜衣服錢帛諸物等。捉獲賊。或累貨估價錢。每五十貫文。決沙袋一百。累至二百五十貫文。

決沙袋五百。配徒五年。若更有錢時。十貫文。打骨錄一下。至骨錄五下。更有錢時。處死。

志第三十一刑法志下

犯竊盜者。初刺右臂。再刺左。三刺頸之右。四刺左。至於五。則處死。

能改齋漫錄曰。契丹之法。民爲盜者。一犯文其腕爲賊字。再犯文其臂。三犯文其肘。四犯文其肩。五犯則斬。不須案籍。而辜不可掩。○燕北雜記曰。正月十三日。放契丹做賊三日。如盜及十貫以上。依法行遣。○松漠紀聞曰。金國治盜甚嚴。每捕獲。論罪外。皆十倍責償。唯正月十六日。則縱偷一日。以爲戲。妻女寶貨車馬。爲人所竊。皆不加刑。是日。人皆嚴備。遇偷至。則笑遣之。旣無所獲。雖畚鍤微物。亦攜去。婦人至顯入人家。伺主者出接客。則縱其婢妾盜飲器。他日知其主名。或偷者自言。大則具茶食以贖。謂羊酒肴饌之類。次則攜壺小飲。或打餅取之。亦有先與室女私約。至期而竊去者。女願留則聽之。自契丹以來。皆然。今燕亦如此。

遼史拾遺卷十六

補選舉志

一科目

契丹國志曰太祖龍興朔漠之區。倥偬干戈。未有科目。數世後承平日久。始有開闢。限以三歲。有鄉府省三試之設。鄉中曰鄉薦。府中曰府解。省中曰及第。有秀才未願起者。州縣必根刷遺之。程文分兩科。曰詩賦。曰經義。魁各分焉。三歲一試進士。貢院以二寸紙書及第者姓名給之。號喜帖。明日舉案而出。樂作及門。擊鼓十二面。以法雷震。殿試臨期取旨。又將第一人特贈一官。授奉直大夫翰林應奉文字。第二人。第三人止授從事郎。餘竝授從事郎。聖宗時止以詞賦。法律取士。詞賦爲正科。法律爲雜科。若夫任子之令。不論文武竝奏蔭。亦有員數。○易水志曰保寧九年進士易州魏璟。統和二年魏上達。五年魏元真。

鷄案。史稱景宗保寧八年。詔復南京禮部貢院。聖宗統和六年。詔開貢舉。而保寧九年。至統和五年。十年之中。易州已有進士三人。又出一姓。皆在未開貢舉之前。豈景宗詔復貢院之後。南京已設科而未及他處耶。惜不可考矣。

涿州志曰王吉甫。涿州人。天慶二年試律學第一。除參軍。○李世弼。金登科記曰。天會四年。姑設科舉。

有詞賦有經義有同進士有同三傳有同學究凡五等詞賦之初以經傳子史內出題次又令逐年改一經亦許注內出題以詩書易禮春秋爲次蓋猶遼舊也○元好問遺山文集曰遼以科舉爲儒學之極致假貸剽竊牽合補綴視五季又下衰○王圻續文獻通考曰遼道宗咸雍六年設賢良科詔應是科者先以所業十萬言進十年六月御永安殿策賢良天祚帝乾統二年閏五月策賢良

鶚案王圻所引俱出遼史以其有關選舉故載於編補經籍志同

二世選

續文獻通考曰遼太宗天顯二年十二月詔選遙輦氏九帳子弟可任官者穆宗應歷五年四月命郎君蕭海瓌世爲北府宰相景宗保寧時耶律思溫爲北院樞密使兼北府宰相仍命世預其選聖宗統和九年七月詔有沒於王事者官其子孫時耶律諧理伐宋獲其將康保威以功詔世預節度使選宰相韓德讓貴寵蕭敵魯希旨言德讓宜賜國姓籍橫帳由是世預太醫選子孫入官者衆興宗重熙十六年二月詔世選官擇有才能者用

三貨選

續文獻通考曰遼道宗大安四年四月立入粟補官法

四學校

續文獻通考曰遼太祖時置上京國子監設祭酒司業監丞主簿時南京立太學聖宗統和九年八月

以南京太學生員寢廣。特賜水磴莊一區。道宗清寧五年。詔設學養士。頒五經及傳疏。置博士助教各一員。六年六月。中京置國子監。

鶚案。南京太學賜水磴莊一區。遼史本紀。係統和十三年九月事。詔設學。頒五經傳疏。係清寧元年十二月事。王圻所引年月誤矣。

宣府鎮志曰。契丹初興。惟尙武藝。燕趙閒學校。俱仍唐舊。閒羅兵燹。十存二三。取用文士。多由是奮。興宗重熙五年。始御元和殿。以日射三十六熊賦。幸燕。詩試進士於廷。著爲令式。至道宗。乃詔設學。養士。於是。有西京學。有奉聖。歸化。雲德。宏蔚。媯。儒等州學。各建孔子廟。頒賜五經諸家傳疏。令博士助教教之。屬縣附焉。

鶚案。此但據西京諸州言之。五京諸州俱有學也。

補經籍志

鶚案。諸簿錄家所載遼人撰著。大率多本遼史紀傳。閒有出於史外者。不多得也。予作補經籍志。聊備其目而已。傳於今者。亦寥寥無幾矣。

經類

耶律庶成、蕭韓家奴禮書。

遼朝雜禮。

已上出黃虞稷金陵黃氏書目。

龍龕手鑑四卷。晁氏作三卷。非。

夢溪筆談曰。幽州僧行均集佛書中字。爲切韻訓詁。凡十六萬字。分四卷。號龍龕手鑑。燕僧智光爲之序。甚有詞辯。契丹重熙二年集。契丹書禁甚嚴。傳入中國者法皆死。熙寧中有人自虜中得之。入傅欽之家。蒲傳正帥浙西。取以鏤版。其序末舊題重熙二年五月序。蒲公削去之。觀其字音韻次序。皆有理法。後世殆不以其爲燕人也。○郡齋讀書志曰。契丹僧行均撰。凡二萬六千四百三十字。注十六萬三千一百餘字。僧智光爲之序。後題云統和十五年丁酉。案紀年通譜。耶律隆緒嘗改元統和。丁酉。至道三年也。沈存中言。末題重熙二年五月序。蒲公削去之。今本乃云統和。非重熙字。存中不見舊題。妄記之耶。○錢曾讀書敏求記曰。燕僧行均。字廣濟。俗姓于氏。編龍龕手鑑。以平上去入爲次。隨部復用四聲列之。計二萬六千四百三十餘字。注一十六萬三千四百餘字。統和十五年丁酉七月初一日癸亥。燕臺憫忠寺沙門智光。字法炬爲之序。○燕臺憫忠寺沙門智光撰龍龕手鑑序曰。夫聲明著論。迺印度之宏綱。觀迹成書。實支那之令躅。印度則始標天語。厥號梵文。載彼貫綫之花。綴以多羅之葉。開之以字綠。字界。分之以男聲女聲。支那則創自軒轅。制於沮誦。代結繩於旣往。成進牘以相沿。辯之以會意象形。審之以指事轉注。洎乎史籀變古文爲大篆。程邈變大篆爲隸書。蔡邕刊定於石經。東哲推詳於竹簡。九流競驚。若百谷之朝宗。七略遐分。比衆星之拱極。尋源討本。備載於埤蒼。廣蒼。叶律諧鍾。咸

究於韻英、韻譜、專門則字統、說文、開牖則方言、國語、字學於是乎昭矣。矧復釋氏之教、演於印度、譯布支那、轉梵從唐、雖匪差於性相、披教悟理、而必正於名言、名言不正、則性相之義差、性相之義差、則修斷之路阻矣。故祇園高士、探學海洪源、準的先儒、導引後進、輝以寶燭、啓以隨函、郭遂但顯於人名、香嚴唯標於寺號、流傳歲久、鈔寫時譌、寡聞則莫曉、是非博古則徒懷惋歎、不逢敏達、孰爲編修、有行均上人、字廣濟、俗姓于氏、派演青齊、雲飛燕晉、善於音韻、閒於字書、觀香嚴之不精、寓金河而載緝、九仞功績、五變炎涼、具辯官商、細分喉齒、計二萬六千四百三十餘字、注一十六萬三千一百七十餘字、并注總一十八萬九千六百一十餘字、無勞避席、坐奉師資、詎假擔簦、立祛疑滯、沙門智光、利非切玉、分忝斷金、辱彼告成、見命序引、推讓而寧容閣筆、俛仰而強爲抽毫、矧以新音、徧於龍龕、猶手持於鸞鏡、形容斯鑒、妍醜是分、故目之曰龍龕手鑑、總四卷、以平上去入爲次、隨部復用四聲列之、又撰五音圖式、附於後、庶力省功倍、垂益於無窮者矣、時統和十五年丁酉七月一日癸亥序。

史類

耶律儼皇朝實錄七十卷

蕭韓家奴、耶律庶成同撰遙輦可汗至重熙以來事迹二十卷

室昉統和實錄二十卷

蕭永祺遼紀四十卷、志五卷、傳四十卷

已上出金陵黃氏書目。

契丹宮儀。

契丹事迹。

契丹疆宇圖。宋史藝文志二卷。

契丹實錄。

契丹會要。

已上出尤袤遂初堂書目。

大遼登科記一卷。

大遼對境圖。

契丹地理圖。宋史藝文志一卷。

已上出鄭樵通志藝文略。

遼四京記。

直齋書錄解題曰。亦無名氏。曰東京、中京、上京、燕京。

王鼎焚椒錄一卷。

七賢傳。

金陵黃氏書目曰。取遼世名流七人爲之傳。耶律吼其一也。

遼三臣行事。耶律孟簡著。

出王圻續文獻通考。

鷄案。孟簡大康中所編。耶律曷魯、屋質、休哥三人行事。見文學傳。

子類。

王白百中歌。

耶律純耶律學士星命祕訣五卷。

已上出金陵黃氏書目。

直魯古鍼灸脈訣書一卷。

出連江陳第世善堂書目。

燕僧利正撰長慶人事軍律三卷。

出通志藝文略。

內丹書。聖宗統和八年。于闐張文寶進。

道宗御製華嚴經贊。咸雍四年二月頒行。

回紇僧撰金佛梵覺經。

高麗佛經。大康十年。命僧善智校讎頒行。

已上出續文獻通考。

僧非濁撰往生集二十卷。

出奉福寺尊勝陀羅尼石幢記。

集類。

道宗御製清寧集。耶律良編。

出續文獻通考。

李氏應歷小集十卷。

通志藝文略曰。李澣。晉末陷契丹。以遼應歷年號名集。

海蟾子詩一卷。

出通志藝文略。

李澣丁年集十卷。

楊佶登瀛集五卷。

劉景集四十卷。

已上出宋史藝文志。

耶律隆先園苑集。

蕭資忠西亭集。

穆孝穆寶老集。

蕭柳歲寒集。

蕭韓家奴六義集十二卷。

耶律孟簡放懷詩一卷。

耶律良慶會集。

已上出續文獻通考。

遼史拾遺卷十七

表第一世表

開皇末，別部四千餘戶，違突厥來降。

冊府元龜曰：開皇四年五月，契丹王莫賀弗遣使請降，拜大將軍。

契丹地。

路振九國志曰：契丹代居遼澤之中，潢水南岸，南距榆關一千一百里，榆關南距幽州七百里。

開元二年，盡忠從父弟失活率部落歸唐。四年，與奚長李大酺偕來，詔復置松漠府，以失活爲都督，封松漠郡王。

冊府元龜曰：開元四年八月，契丹李失活、奚李大酺各以所部來降。制曰：混一六合，紀綱四海，開物所以包舉華夷，列爵所以範圍中外。契丹松漠州都督李失活、奚饒樂州都督李大酺等，竝材雄劍騎，家襲簪組，翻飛涿鹿之郊，高視無閭之地，往屬誑惑，遂爾攜離。海表爲虞，在苞桑之厚戒，彙征順命，乃連茹而同歸。柔懷有章，寵渥斯在，俾侯利建，宜膺胙土之榮。上將師貞，仍允齋壇之拜。失活可封松漠郡王，食邑三千戶。行左金吾衛大將軍。大酺可封饒樂郡王，食邑三千戶。行右金吾衛大將軍。竝員外置餘如故。

五年以楊氏爲永樂公主下嫁失活。

冊府元龜曰開元五年八月詔曰故東平王外孫正議大夫復州司馬楊元嗣第七女譽叶才明體光柔順葭葦懿戚敦睦有倫舜華靡顏德容竝茂屬賢王慕義於以賜親納女問名茲焉迨吉宜昇外館之寵俾耀邊城之地可封永樂公主出降契丹松漠郡王李失活婚之夜遣諸親高品及兩蕃太守領觀花燭。

開元十年鬱于入朝以慕容氏爲燕郡公主下嫁鬱于。

冊府元龜曰開元十年契丹松漠郡王鬱于入朝請婚帝令慕容嘉賓女封燕郡公主以妻之。

邵固咄于之弟國人共立之開元十三年冬朝於行在從封禪泰山改封廣化郡王以陳氏爲東光公主下嫁邵固。

冊府元龜曰開元十三年契丹立李盡忠弟邵固爲主其冬車駕東巡邵固詣行在所改封廣化郡王封皇從外甥女陳氏爲東光公主以妻之制曰李邵固輸忠保塞乃誠奉國屬升中於天無遠而不屆華夷靡隔等數有加宜錫休名俾承慶澤。

大賀氏附庸於奚王以通於唐朝貢歲至。

劉昫舊唐書曰天寶十二年契丹降附迄於貞元常閒歲來修蕃禮貞元四年與奚衆同寇我振武大掠人畜而去九年十年復遣使來朝大首領悔落拽河已下各授官放還十一年大首領燕蘇等二十

五人來朝。自後至元和、長慶、寶歷、太和、開成時，遣使來朝貢。

李懷秀，唐賜姓名，契丹名迪輦俎里，本八部大帥。天寶四年降唐，拜松漠都督。

册府元龜曰：天寶四載，封外甥女獨孤氏爲靜樂公主，降松漠都督崇順王李懷節。九月，契丹酋長殺公主，舉部以叛。

鶚案：懷秀、懷節名不同，未知孰是。

楷落以唐封恭仁王，代松漠都督，遂稱契丹王。

册府元龜曰：天寶五載四月，封契丹王楷維爲恭仁王，仍授松漠府都督。

契丹王欽德，習爾之族也，是爲痕德堇可汗。光啓中，抄掠奚、室韋諸部，皆役服之。數與劉仁恭相攻。晚年政衰，八部大人法常三歲代，迭刺部耶律阿保機建鼓旗自爲一部，不肯受代，自號爲王。盡有契丹國，遙輦氏遂亡。

蘇逢吉漢高祖實錄曰：契丹本姓大賀氏，後分八部，一曰利皆部，二曰乙失活部，三曰實活部，四曰納尾部，五曰頻沒部，六曰內會部，七曰集解部，八曰奚嗚部。管縣四十一，縣有令，八族之長皆號大人。稱刺史，常推一人爲王，建旗鼓以稟之。每三年，第其名以相代。○賈緯備史曰：後唐武皇會阿保機於雲州城，結以兄弟之好，時列兵相去五里，使人持杯往來，以展酬酢之禮。阿保機喜，謂武皇曰：我蕃中酋長，舊法三年則罷，若他日見公，復相禮否？武皇曰：我受朝命鎮太原，亦有遷移之制，但不受代則可。

何憂罷乎。保機由此用其教，不受諸族之代。○唐莊宗列傳曰：咸通末，契丹王曰習爾，疆土稍大，累來朝貢。光啓中，其王曰欽德，乘中原多故，北邊無備，遂蠶食諸部，達鞠、奚、室韋之屬，咸被驅役。及欽德政衰，阿保機族盛，自稱國王。

表第二皇子表

德祖六子刺葛，字率懶第二，與弟迭刺、安端等謀亂。太祖念其同氣，不忍加刑，杖而釋之。神冊二年，南奔。資治通鑑曰：契丹主之弟撒刺阿撥，即刺葛，號北大王，謀作亂於其國。事覺，契丹主數之曰：汝與吾如手足，而汝與此心，我若殺汝，則與汝何異？乃囚之。期年而釋之。撒刺阿撥帥其衆奔晉，晉王厚遇之，養爲假子，任爲刺史。胡柳之戰，以其妻子來奔。後唐莊宗同光元年，詔敬翔、李振首佐朱溫，共傾唐祚。契丹撒刺阿撥叛，兄棄母，負恩背國，宜與趙巖等竝族誅於市。

太宗五子罷撒葛第二，景宗封齊王，保寧四年病疽薨。

續資治通鑑長編曰：契丹供奉官李信來歸，言其國中事云：景宗蕭后有姊二人，長適齊王，王死，自稱齊妃，領兵三萬屯西鄙。驢駒兒河嘗閱馬，見蕃奴撻覽，阿鉢姿貌甚美，因召侍帳中。蕭氏聞之，熟撻覽阿鉢，挾以沙囊，四百而離之。踰年，齊妃請於蕭氏，願以爲夫。蕭氏許之，使西捍達鞠，盡降之。因謀帥其衆奔骨歷札國，結兵以篡蕭氏。蕭氏知之，遂奪其兵，命領幽州。

景宗四子隆慶，字燕隱，小字普賢奴第二。

契丹國志曰。皇太弟隆慶生而岐嶷。幼時與羣兒戲。爲行伍戰陣法。指揮意氣。無敢違者。景宗奇之。曰。此吾家生馬駒也。

隆祐小字高七。一字胡都董第三。統和中。伐宋。留守京師。

契丹國志曰。齊國王隆祐。性沈毅。美姿容。自少時慕道。後爲東京留守。別置道院。延接道流。誦經宣醮。用素饌薦獻。

藥師奴第四早卒。葬王子院。

續資治通鑑長編曰。契丹供奉官李信云。景宗四子。長名隆緒。卽戎主。次名贊。封梁王。次名高七。封吳王。次鄭哥。八月而夭。

表第三公主表

太祖一女質古。下嫁瀋欽皇后弟蕭室魯。幼爲奧姑。契丹故俗。凡婚燕之禮。推女子之可尊敬者坐於奧。謂之奧姑。未封而卒。

契丹國志曰。述律述魯。卽蕭室魯。太祖皇后兄也。蕃部人。世爲會長。少壯武有膽略。部人憚之。從太祖平奚有功。授統軍使。盧文進自新州來奔。太祖歲入燕塞。述魯以兵從。又從圍周德威於幽州。機巧善智。城幾克。會救至。退師。改授奚王府監軍。東路兵馬都統。軍於屈烈。尙奧哥公主。景宗四女淑哥第四。無封號。與駙馬都尉盧俊不諧。表請離婚。改適蕭神奴。

十國春秋曰。盧俊尙北漢公主。爲駙馬都尉。廣運三年。宋師壓境。俊詣遼乞師有功。白馬嶺之役。遼相耶律沙將趨太原。會俊以國亡出奔。言太原已陷。遂勒兵還。俊至遼。署同政事門下平章事。明年。遼景宗以公主淑哥下嫁俊。復拜駙馬都尉。久之。與淑哥不協。詔離之。改適蕭神奴。遂出俊爲興國軍節度使。終於其國。

聖宗十四女八哥第九。封同昌縣主。進封公主。下嫁劉三嘏。

儒林公議曰。契丹既有幽。薊。鴈。門以北。亦開選舉以收士人。幽州劉氏兄弟。其名曰二元。三嘏。四端。五常。六符。皆被任遇。三嘏。四端。復尙主。慶歷中。三嘏攜嬖妾偕一子投廣信軍。詞情悲切。自言主兇。狠必欲殺其妾與子。故歸朝廷。頗論其國中機事。復爲詩以自陳云。雖慙滯勺赴滄溟。仰訴丹衷不爲名。寅分星辰將降禍。兌方疆宇卽交兵。春秋大義惟觀釁。王者雄師但有征。救取燕民歸舊主。免於戎虜歲稱兄。朝廷以誓約旣久。納之生釁。虜又移文邊郡。躡知三嘏未還。求索峻切。期於必得。不然。則舉兵墜好矣。朝廷乃遣還三嘏。復由西山路入定州境。所至以金賂村民求宿食。勢益窘迫。定帥遣人搜索。拘送虜界。比三嘏至幽州。其妻已先在矣。乃殺其妾與子。械送三嘏。以其羈弟皆方委任。遂貸三嘏死。使人監錮之。

鶚案。劉六符傳云。三嘏與公主不諧。奔宋。歸。殺之。當以史爲正。
天祚六女。文妃生一女。余里衍。爲金人所獲。

金節要曰：二太子即幹離不之妻余輦公主，乃遼主天祚之女。

鶻案：金史曰：宗望即幹離不，襲遼主於陰山，青冢之間，直至遼主營。時遼主往應州，其嬪御諸女見敵兵奄至，驚駭欲奔，命騎下執之。有頃，後軍至，遼太叔胡盧瓦妃、國王捏里次妃、遼漢夫人并其子秦王、許王、女骨欲、餘里衍、幹里衍、大奧野、次奧野、趙王妃、幹里衍，招討迪六，詳穩六斤，節度使李迭赤、狗兒皆降。太祖嘉宗望功，以遼蜀國公主餘里衍賜之。

表第四皇族表

魏國王查葛，系出景宗孝成康靖皇帝。

契丹國志曰：宗懿蕃名查箇只，即查葛，聖宗弟孝文皇太弟隆慶之子也。少有氣局，幹略過人。聖宗雅愛諸姪，每誡之曰：汝勿以材能陵物，勿以富貴驕人。惟忠惟孝，保家保身。始封中山王，歷龍化川、饒建、宜、平州節度使，改封晉王、薨。

秦晉國王溥稱帝，系出興宗神聖孝章皇帝。

三朝北盟會編曰：秦晉國王溥，興宗之孫，道宗弟和魯幹子。於天祚爲從叔，初道宗囚其子濬，欲立溥爲儲貳，不果。已而立天祚。溥守燕十二年，得人心，號燕王。又謂九大王，又謂覃湘大王。

表第五外戚表

大同元年，太宗自汴將還，留外戚小漢爲汴州節度使，賜姓名曰蕭翰。

契丹國志曰。蕭翰。契丹之大族。其號阿鉢。翰之妹嫁德光。而阿鉢本無姓氏。契丹呼翰爲國舅。及將以爲節度使。李崧爲制姓名曰蕭翰。於是始姓蕭。

北府宰相阿古只。

冊府元龜曰。莊宗同光初。滄州奏偵聞契丹國舅撒刺宴送羊馬於幽州。申和好。二年八月。幽州進契丹國舅撒刺宴書。

鶻案。後唐同光初。爲遼太祖天贊初。是時瀆欽皇后弟蕭阿古只爲北府宰相。略地燕趙。所云撒刺宴。疑卽阿古只。本傳云。字撒本。

表第六遊幸表

太宗天顯九年五月射柳。○穆宗應歷六年九月擊鞠。

鶻案。金史禮志曰。射柳。擊毬之戲。亦遼俗也。金因尙之。凡重五日拜天禮畢。插柳毬場爲兩行。當射者以尊卑序。各以帕識其枝。去地約數寸。削其皮而白之。先以一人馳馬前導。後馳馬以無羽橫鏃。箭射之。旣斷柳。又以手接而馳去者爲上。斷而不能接去者次之。或斷其青處。及中而不能斷。與不能中者爲負。每射必伐鼓以助其氣。已而擊毬。各乘所常習馬。持鞠杖。杖長數尺。其端如偃月。分其衆爲兩隊。各爭擊一毬。先於毬場南立雙桓。置板。下開一孔爲門。而加網爲囊。能奪得鞠。擊入網囊者爲勝。或曰。兩端對立二門。互相排擊。各以出門爲勝。毬狀小如拳。以輕韌木枒其中。而朱之。皆所

以習蹻捷也。既畢，賜宴，歲以爲常。

聖宗統和十一年正月，幸延芳淀。

燕山叢錄曰：灤縣西有延芳淀，大數頃，中饒荷芰，水鳥羣集其中。遼時，每季春必來弋獵，打鼓驚天鵝飛起，縱海東青禽之，得一頭鵝，左右皆呼萬歲。海東青大僅如鵠，既縱，直上青冥，幾不可見，俟天鵝至半空，歛自上而下，以爪攫其首，天鵝驚鳴，相持殞地。

興宗重熙十一年十二月，幸延壽寺飯僧。

松漠紀聞曰：燕京蘭若相望，大者三十有六，然皆律院。自南僧至，始立四禪寺，曰大覺、招提、竹林、瑞像。延壽院主有質坊二十八所，僧職有正副判錄，或呼司空。

道宗清寧十年九月，幸七金山三學寺。

耶律楚材湛然居士集三學寺改名圓明，仍請予爲功德主，因作疏曰：粵三學之巨刹，冠四海之名藍。今改僧而舍尼，遂從禪而革律，邀印公爲粥飯頭，請湛然作功德主。○張翥蛻庵集遊城南三學寺詩曰：城南多佛刹，結構自遼金。旁舍遺民在，殘碑好事尋。雨苔塵壁暗，風葉石幢深。一飯蒲團了，蕭蕭鐘磬音。

鶚案：興宗紀重熙十一年十二月，以宣獻皇后忌辰，上與皇太后素服飯僧於延壽、憫忠、三學三寺。則寺在南京城南無疑，但七金山不可考耳。又案兵衛志云：聖宗統和二十三年，城七金山，建大定。

府號中京。則七金山在中京。豈另有三學寺耶。抑二事竝書耶。

咸雍三年七月。獵於赤山。

使遼錄曰。北地鵬巢中生獵犬。極難得。今駕前有二隻。其性頗異。每獵而獲。十倍於常犬。北馬有割去肝者。遂無病能行。其法飲以醇酒。於腋間破之。取去少肉。然亦十喪八九。

鶚案。舜民使遼。在道宗時。故此條屬焉。

表第七部族表

太祖元年。黑車子室韋八部降。

通典曰。室韋有五部。後魏末通焉。并在靺鞨之北。路出柳城。諸部不相總一。所謂南室韋、北室韋、鉢室韋、深末怛室韋、大室韋。竝無君長。人衆貧弱。突厥沙鉢略可汗常以吐屯潘埒統領之。蓋契丹之類也。南室韋在契丹北三千里。土地卑溼。至夏則移向西貸勃。久對二山。多草木。饒禽獸。又多蚊蚋。人皆巢居以避其患。衣服與契丹同。寢則屈木爲室。以籬條覆上。移則載行。以豬皮爲席。編木藉之。氣候多寒。田收甚薄。無羊。少馬。多豬牛。造酒食噉。言語與靺鞨同。婚姻之法。二家相許。壻輒盜婦去。然後送牛馬爲聘。婦人不再嫁。以爲死人妻。難以共居。部落共爲大棚。人死則置屍其上。居喪三年。自南室韋北行。十一日至北室韋。氣候最寒。冬則入山居穴中。牛畜多凍死。俗皆捕貂爲業。冠以狐貉衣。以魚皮。又北行千里至鉢室韋。依胡布山而住。用樺皮蓋屋。從鉢室韋西四日行至深末怛室韋。因水爲號。冬月穴

居以避太陰之氣。又西北數千里至大室章。徑路險阻。言語不通。尤多貂及青鼠。後魏武定。隋開皇。大業中。竝遣使朝獻。大唐所聞。有九部焉。屢有朝貢。所謂嶺西室章。北室章。黃頭室章。大如者室章。小如者室章。訥婆。高室章。達末室章。駱駝室章。並在柳城郡之東北。近者三千五百里。遠者六千二百里。○陷北記曰。黑車子善作車帳。其人知孝義。地貧無所產。云契丹之先。常役回紇。後背之。走黑車子。始學作車帳。○又曰。一曰室章。二曰黃頭室章。三曰獸室章。其地多銅鐵金銀。其人工巧。銅鐵諸器皆精好。善織毛錦。地尤寒。馬溺至地成冰堆。○冊府元龜曰。南室章在契丹北三千里。分爲二十五部。每部有餘莫弗。瞞咄。猶酋長也。北室章在南室章北行十一日。其國分爲九部落。繞吐紇山而居。其部落渠帥。號乞引莫賀咄。每部有莫何弗三人以貳之。鉢室章在北室章北千里。依胡布山而住。人衆多於北室章。不知爲幾部落。大室章在鉢室章西北數千里。○契丹國志曰。室章國。室或爲失。契丹之類。其在南者爲契丹。在北者號爲室章。路出和龍北千餘里。入室章國。與奚。契丹同。夏則城居。冬逐水草。有南室章。北室章。其俗。丈夫皆披髮。婦人皆盤髮。衣服與契丹同。乘牛車。以籬條爲屋。如氈車狀。度水則束薪爲筏。或有以皮爲舟者。馬則織草爲韉。結繩爲轡。氣候多寒。田收甚薄。惟射獵麋鹿爲務。食肉衣皮。鑿冰沒水中而網取魚鼈。地多積雪。懼陷阬窄。騎木而行。太祖并諸蕃三十六國。室章在其中。

聖宗統和十五年。罷奚五部歲貢麋鹿。

通典曰。庫莫奚者。其先東部鮮卑宇文之別種也。初爲慕容晃所破。遺落者竄匿松漠之間。其俗甚不

潔而善射獵。好爲寇抄。後魏之初。頻爲寇盜。及突厥興而臣屬之。後稍彊盛。分爲五部。一曰辱紇。主二日莫賀弗。三日契箇。四曰木崑。五曰室得理。饒樂水北。卽鮮卑故地。每部置俟斤一人爲帥。隨逐水草。頗同突厥。有阿會氏。五部中爲盛。諸部皆歸之。其俗死者以葦箔裹屍。懸之樹上。其後款附。至隋代。號曰奚。○五代會要曰。奚本匈奴別種。卽東胡之地。人物風俗與突厥同。有五部。一曰阿蒼部。管縣六。二曰啜末部。管縣四。三曰奧質部。管縣六。四曰奴皆部。管縣四。五曰黑訖支部。管縣三。每部有刺史。每縣有令。酋長號奚王。唐制兼饒樂府都督。居陰涼州。東去營州五百里。南去幽州九百里。幽州置饒樂府。長史一人監之。後徙居琵琶川。在幽州東北數百里。出古北口。地宜羊馬。羊則純黑。馬則前臚。堅善走。以馳獵爲務。逐獸高山。自下而上。其勢若飛。語與契丹小異。饜以平底瓦鼎。煮稷爲粥。旣飪。以寒水解之而食。每春借民之荒田種稷。秋熟來穫。畢則窖於山下。人莫知其處。自天祐初。契丹兵力漸盛。室韋奚。鬻皆受制焉。故奚之部族爲契丹代守邊土。暨虜酷虐。其首領去諸怨之。以別部內附。徙於媯州。依北山而居。漸有數千帳。故有東西奚之號。去諸卒。其子掃刺代立。後唐莊宗破幽州。賜掃刺姓李。名紹威。至晉天福元年。高祖以契丹有助立之功。割鴈門已北及幽州之地賂之。繇是奚之部族復隸於契丹。開運三年十二月。契丹犯關。其王拽刺以所部兵屯於洛陽。及德光死。隨衆北遁。○文獻通考曰。紹威卒。子拽刺立。初紹威娶契丹女舍利逐不魯之姊爲妻。後逐不魯叛亡入西奚。紹威納之。晉高祖入立。割幽州。鴈門以入於契丹。是時紹威與逐不魯皆已死。德光已立。晉北歸。拽刺迎謁馬前。德光曰。非

爾罪也。負我者掃刺與逐不魯耳。乃發其墓。粉其骨而颺之。自去諸徙媯州。自別爲西奚。而東奚在琵琶川者。亦爲契丹所并。不復能自見云。

開泰元年。曷蘇館大王曷里喜來朝。

松漠紀聞曰。黃頭女真者。皆山居。號合蘇館女真。合蘇館。河西亦有之。有八館在黃河東。今皆屬金人。與金粟城。五花城。隔河相近。三城八館。舊屬契丹。今屬夏人。金人約以兵取關中。以三城八館報之。後背約再取八館。而三城在河西。屢爭不得。其一城忘其名。

其人。慧樸勇鷲。不能別死生。金人每出戰。皆被以重札。令前驅。謂之硬軍。疑卽黃頭室韋也。金國謂之黃頭生女真。髡髮皆黃。目睛多綠。亦黃而白多。因避契丹諱。遂稱黃頭女直。

